

Tí xroon saoxín ikjin ch'ín Pablo chr'énhen ch'án tí sín tinkáchónki Cristo síin chjasin Corinto

Ch'ín Pablo mé ikjin ch'án xroon ichr'án ch'án tí n̄nko chjasin Corinto

¹ Janhan Pablo mé kjueyána Dios tjinkaon ch'án kixin kjuachaxin kuente Ìnchéni Jesucristo mé chrókjuít'ahā ch'án xra. Janhan la ko kichó ni Sóstenes mé

² ikjinni tí xroon i chr'ánhanráni tí jahará tójnksérá n̄nko chjasin Corinto. Ó kjuínchetjóará Ìnchéni Jesucristo na mé kjueyára Dios tí jahará kixin chrók'uaxrjekjanxínrá tí sín tjasin jiē kixin tjinkaon ch'án tí jahará kixin tjóá chrók'uejorá la ko xikaha kjueyá ch'án kaín xín tí sín tjanchehe sín Ìnchéni Jesucristo kixin chrókjuinkitsa ch'án sín, tíha mé Ìnché sín la ko Ìnchéni.

³ Kjuasáyé It'éni Dios la ko Ìnchéni Jesucristo chrókjuintayaonrá ch'án la ko chrótjáhará ch'án kjuaxróxin.

Ìnchéni Cristo mé tjencheyaoon tí sín ntíha

⁴ Jnkochríxín tjáncháha Dios kjuasáya kixin sintayaonrá ch'án tí jahará kixin tinkachónkirá Ìnchéni Cristo Jesús.

⁵ Na mé Dios tjáhará kjuachaxin kuente ch'án ntá xikaha antsí jína nohará chrónkaḡxínrá kixin

nkexrí tinkachónkirá Ìnchéni la ko kjaxin aṅsí jína tiénxinrá kaín nkehe chaxín ntoá.

⁶ Tí nkehe kuínhínrá kixin nkexrí tjen Cristo na ntá jie jahará tjákoṣínrá.

⁷ Ntá jahará ó chontará kaín xín tí kjuachaxin kuènte Nchakuen Dios, la í ninkehó t'itjáyankíhya tí kjuachaxin kuènte ch'án k'uayéhérá nachrohe tjejochonhénrá tsokjan Ìnchéni Jesucristo.

⁸ Ntá Ìnchéni ts'ayakonhanrá ch'án kixin tsitoéhyará tí tinkachónkirá ch'án hasta tsjixraká tí yaon tsjixixín. Ntá ninkexró ts'ekahyará jie kixin ntoáhya tjejoch'erá, tsixro sín, tí yaon tsokjan ch'án.

⁹ Ó noheni kixin Dios chaxín sinchexiteyá ch'án tí nkehe ntáchro ch'án kixin jehe ch'án mé tsíkjeyará ch'án kixin chrókuinkachónkirá tí Xjeen ch'án Jesucristo, mé Ìnchéni tíha.

Jnkokoáhya kjuenkayáxin tí sín tinkáchónki Cristo ntiha chjasin Corinto

¹⁰ Kíchóni, xrjanóaxínrá tí kjuachaxin ihnié Ìnchéni Jesucristo kixin jnkokoá chrókjuenkayáxinrá la ko chrók'uaxrjentahyará ókjé na mé jnkokoá chrókjuenkayáxinkoará kichuára.

¹¹ Kíchóni, ó kuínhan tí nkehe chrónka tí sín kjéhya ch'ín Cloé kixin siín kjuanínkaon tí tjejorá tójnksérá ntiha.

¹² Na mé ntáxrjan kixin isorá ntáchrórá kixin jahará chréhérá tí janhan Pablo, la ko í sorá ntáchrórá kixin jahará chréhérá tí ch'ín Apolos, la ko í sorá ntáchrórá kixin jahará chréhérá tí ch'ín Pedro, la ko í sorá ntáchrórá kixin chréhérá Cristo.

13 ¿Xá nkekjaín Cristo síin kixin? ¿Á jehya jnkokoá Cristo tinkáchónkini? ¿Á janhan Pablo k'uényákonhanrá ní? ¿Á kuíkitexínrá tí nina ní?

14 Tjáncháha Dios kjuasáya kixin nijnko tí jahará kuíkitiahará ntiha. Jehó ch'ín Crispo la ko ch'ín Gayo mé kuíkite janhan.

15 Na mé nijnkorá xitjahya tsontáchrórá kixin nina kuíkitexínrá.

16 Kjaxin jehó kuíkite tí ch'ín Estéfnas la ko tí sín kjéhya ch'án. Xráxinkakonhya á kuíkite í so sín o náhí.

17 Kixin tí xra chjina Cristo jehya kixin chrókuíkite chojni. Náhí. Tí xra chjina Ìnchéni kixin tsoxrjanakaxián tí tan tsaáxinni. Tjínkakonhya kixin chrókjuákoxián palabra náxrjón noi kixin xikaha chrókjuákua ntá chrókjuíntamá tí kjuachaxin jié kónoxín tí k'uénxin Ìnchéni Jesús tí ntacruz, kjuák'enkáni ch'án, k'uenyákonhenni ch'án.

Cristo mé tjakoxin tí kjuachaxiэн Dios la ko tjakoxin ch'án kixin imá nohe Dios

18 Chronkaxínni kixin k'uenyákonhenni Cristo tí ntacruz. A ntá tí tsinhin tí sín xráxín ts'itjáyan ntá ts'ikon sín tíha éxí nkehe chónkó. A ntá kaín ni chojni kuaáni mé t'ikonni kixin kjuachaxin jié tíha.

19 Mé xikaha ntáchró xroon itén Dios tsíkjin sín ósé kixin Dios mé sinchek'itjáyan tí nkehe tjenkayáxin tí sín imá nohe, la ko tsítóenta ch'án tí nkehe ntáchró tí sín imá tienxín sín.*

20 ¿Mé nkehe tsonhen ntáchró sín kixin imá nohe sín la ko nkehe tsonhen tjako sín la ko nkehe tsonhen tí imá nohe sín nixja sín? Táha la nkehe

* 1:19 Isaías 29.14

sín chjasintajni ó. A ntá Dios mé t'ikon ch'án kixin lontj sín kixin xikaha ichro sín.

²¹ Kixin Dios antsí nohe ntá xikaha kuítóehya ch'án kixin kjuachaxin kuente sín ó chrókjuacha sín chróchóxixín sín ch'án. Ntá kóxrjínhjn Dios chrókjueyá ch'án chrókjuinchekaá ch'án tí sín kuítekaon tí tan tsaáxinni mé tí nkehe ó chónkó, ichro tí sín ókjé.

²² Tí sín judío mé tjinkaon sín chrók'uikon sín kjuaxroan jíé, ichro sín. A ntá tí sín nkiva griego mé xritjeyá sín kixin antsí chrókónohe sín, ichro sín.

²³ A ntá jeheni kaín ni tinkáchónkini Cristo la tjinkakonhyani chrókónoheni kaín tíha la mé jehó Cristo tjako^xinni. Chrónkani kixin ijnko ntacruz kjuák'enkáni ch'án, k'uénxin ch'án. A ntá tí sín judío ntáchro sín kixin ijnko nkehe chrókósuèheni chrókuinkáchónkini tíha, ichro sín. A ntá tí sín jehya judío ntáchro sín kixin chojni lontj tí jeheni kixin xikaha tinkáchónkini, ichro sín.

²⁴ A ntá tí sín kjueyá Dios, kjónté judío sín na o griego sín, la kaín ni ntáchroni kixin Cristo mé k'uenyákonhenni ch'án. Mé xikaha tjako^xin Dios tí kjuachaxin jíé la ko tí kjuaxrexinkaon jína kuente ch'án.

²⁵ Ntá jehe sín ntáchro sín kixin éxí ijnko nkehe chónkó tí nkehe kjuenkayáxin Dios, na kjónté xikaha la antsí tjetóxin nohe Dios. A ntá tí sín imá nohe ntihi chjasintajni tsjachahya sín sincheyóhe sín ch'án. La ko kjaxin ntáchro sín kixin jíehya tí kjuachaxin chónka Dios. A ntá tí sín antsí má chónka kjuachaxin ntihi chjasintajni kjónté la tóyóehya sín Dios kixin antsí chónka ch'án kjuachaxin t'etōan ch'án.

26 Kíchóni, xráxinkáonrá nkexrí k'uéjorá ntá kjónté kjueyará Dios tí jahará. Na mé tsjéhyará imá kónohará éxí t'ikon tí sín chjasintajni la kjónté kjueyará Dios tí jahará. La ko tsjéhyará imá kuétoanrá la ko tsjéhyará k'uaxrjeníxinrá tí sín imá k'uék'etoan.

27 Ntá kjónté Dios mé kjueyá iso tí sín noehya éxí t'ikon tí sín chjasintajni kixin xíkaha tjinkaon ch'án chrókjuinchesuèhè ch'án tí sín imá nohe ntihi chjasintajni. La ko kjaxin kjueyá Dios iso tí sín chóntahya kjuachaxin éxí t'ikon tí sín chjasintajni kixin xíkaha tjinkaon ch'án chrókjuinchesuèhè ch'án tí sín imá chóntha kjuachaxin ntihi chjasintajni.

28 Dios mé kjueyá ch'án iso tí sín t'etoanhya la ko iso tí sín ninkehó sínkíhya tónhen sín ntihi chjasintajni kixin jehe ch'án mé chrókjuinçek'itjáyan ch'án kjuachaxién tí sín jehó chrók'uetoan.

29 Méxra xíkaha ninkexró tsjachahya sinchehnke tí tjen Dios.

30 A ntá tí kjuachaxin kuènte Dios mé tinkachónkirá Cristo Jesús, a ntá chóntaxínni Cristo kjuaxrexinkaon jína, la ko tí kjuachaxin kuènte ch'án kóxíka tí jiè kuènteni, la ko tí kjuachaxin kuènte ch'án sinchetjuáxinni ch'án, la ko tí ijnié ch'án k'uèanaxínni ch'án.

31 Mé xíkaha éxí chrónka tí xroon tsíkjin sín ósé ntáchro kixin: “Tí nkexro tjinkaon chrókjuinchehnke ch'án la chrókjuinchehnkehya ch'án la jehó chrókjuakoxin ch'án kixin imá t'etoan tí kjuachaxin kuènte Dios.”†

† 1:31 Jeremías 9.23

2

Ch'ín Pablo mé tjako ch'án kixin Jesucristo kjuák'enkáni ch'án ntacruz

¹ Kíchóni, tió kjuasán ntiha chjasánrá níxjahará chrókjuákohará nkexrí tjen Dios la jehya ijnko tan tienxínhya chojni la ko jehya itan imá noi chrókjuákoáxinrá.

² Kíxin tió k'uéjóni jnkokoá ntiha kjuenkayáxinhya janhan kixin í so nkehe chrók'uitja chróxrjanka la jehó tjínkavan chróxrjanka kixin Jesucristo la kjuák'enkáni ch'án tí ntacruz.

³ K'uéjóni jnkokoá ntiha la ntá jahará ó nohará kixin janhan kjuak'é éxí chrókjuachahya kixin síxrànkana, chràkonna.

⁴ Tí kjuankíxian níxjahará la ko xrjankaxián tí tan tsaáxin chojni, la tjínkakhonhya chrókjuáchrúaxínrá tí nkehe náxrjón níxja chojni tsíkónohe má. Náhí. Tió kjuákohará kónoxín kixin tjékian Nchakuen Dios la ko kónoxín tí kjuachaxin jíé kuènte ch'án,

⁵ kixin jehya kjuaxrexinkaon kuènte chojni tsíkónohe má chrókuinkachónkirá. Náhí. Tí kjuachaxin kuènte Dios mé chrókuinkachónkirá.

Nchakuen Dios mé tsochóxixínni ch'án

⁶ Kjánchó tió tjákoḥa tí sín chaxín ó nohe sín tinkáchónki Inchéni mé xrjanka tí kjuaxrexinkaon antsí noi. Na mé jehya tí nkehe nohe tí sín chjasintajni, la ko jehya tí nkehe nohe tí sín t'etqan chjasintajni, na mé tí kjuachaxin kuènte sín la tjoka ts'itjáyan.

7 Jeheni mé antsí chrónkani tí nkehe jehó Dios nohe, na mé tí nkehe tsíkjenkayáxin ch'án naxa k'ónahya chjasintajni kixin nkexrí tsaáxinni.

8 Nijnko tí sín t'etōan chjasintajni kienxínhya sín tí nkehe tsíkjenkayáxin Dios. A ntá tí chrókiexín sín tíha la ntá chrókjuak'enkanihya sín Ìnchéni tjetōan tí ntacruz.

9 Éxí ntáchro xroon itén Dios tsíkjin sín ósé kixin: Naxa k'uíkōnhya chojni la ko naxa kíenhya chojni, la ko naxa kjuenkayáxinhya chojni kixin nkexrí siín kaín xín nkehe kjuích'éna Dios ts'áyéhe tí sín tjuèhe ch'án.*

10 A ntá Dios mé nchenoexínni kaín tíha kixin chóntani Nchakuen ch'án. Na mé tí Nchakuen Dios mé tjetsjehe kixin nkexrí siín kaín xín nkehe la ko kjaxin nkexrí tjen tí nkehe tjenkayáxin Dios.

11 Na mé ninkexró mé noehya nkexrí tjenkayáxin asén chojni. Na mé jnkojnko chojni mé nohe kixin nkexrí tónhen asén. Méxra xikaha kjaxin kohya nkexro nohe nkexrí tjenkayáxin Dios la jehó tí Nchakuen ch'án mé nohe.

12 A ntá jehya tí nchakuen chojni chjasintajni k'uáyéheni. Náhí. Tí Nchakuen kujxin tí tjen Dios mé k'uáyéheni kixin ntá tsonoexínni kixin kaín xín nkehe kjuínchekitonhenni Dios.

13 Kjaxin jeheni chrónkani tíhi, a ntá jehya chronkaxínni tí nkehe tsíkónohe chojni ó. Náhí. Tí Nchakuen Dios mé nchenoexínni nkexrí tsjakoexínni tí sín chóna Nchakuen ch'án.

14 Kjánchó tí sín naxa chóntahya Nchakuen Dios mé xitjahya ts'áyéhe sín tí nkehe tjanjon Nchakuen

* 2:9 Isaías 64.4

Dios. Na mé éxí lóco t'ikon sín kaín tíha kíxín jehó tí sín chón̄ta Nch̄akuen Dios mé tsjacha sín tsienxín sín tíha.

¹⁵ A ntá tí nkexro chón̄ta Nch̄akuen Dios mé chrókjuacha chrókónohe nkexrí siín kaín xín nkehe. Kjánchó tí nkexró chón̄tahya Nch̄akuen Dios tsjachahya tsjanchia j̄ie tí jehe ch'án.

¹⁶ Méxra ntáchro xroon itén Dios kíxín: ¿Xá ninkexró chrókónohe kíxín nkexrí t̄jenkayáxin Ìnchéni kíxín chrókjuacha sín chrókjuakohe sín ch'án inaá?† Kjánchó jeheni la ó chón̄tani tí kjuaxrexinkaon kuènte Cristo.

3

Tí sín jnkokoá kjuích'ehe sín Dios xra

¹ Mé x̄ikaha, kichó ni, kjuachahya janhan chróníxjahará éxí chojni t'et̄uēnhen asén sín Nch̄akuen Dios. Náhí. Éxí chojni nax̄a nchexiteyéhe sín tí nkehe ntáchro asén sín, na mé éxí xjan ntsíntsí na ntá kjuankíxín kuinkáchónki Cristo mé x̄ikaha tí jahará.

² Janhan na kjuákoáxinrá nkehe xrahya éxí yóhe ijnko xjanhnt̄e tí jahará nax̄a nchekakí ìné tsjen kíxín nax̄a xitjahya sine nkehe cha. Mé x̄ikaha tí jahará nax̄a xitjahya sinterá nkehe cha

³ kíxín nax̄a éxí chojni ó nchexiteyéhérá tí nkehe ntáchro asánrá kíxín tí nax̄a siín kjuachjinoxínhin la ko siín kjuanínkaon la ko jnkokoáhya t̄jenkayáxinrá, la mé tjejoch'erá éxí ch'e kaín xín chojni chjasintajni.

† **2:16** Isaías 40.13

⁴ Isorá ntáchrórá kixin chréhérá tí janhan Pablo, la ko í sorá ntáchrórá kixin chréhérá tí ch'ín Apolos. Na mé éxí chojni chjasintajni ó tjenkayáxinrá.

⁵ ¿Xá nkexro tí Pablo la ko nkexro tí Apolos? A ntá jeheni ó jehí ijnko chojni kjuích'ehe Dios xr̄, a ntá jahará kuinkachónkirá Ìnchéni kixin janhan kjuáko hará. Jnkojnkoní kjuích'eni tí xr̄ kjuanjon Ìnchéni.

⁶ Janhan kuènka, a ntá ch'ín Apolos ìnta kjuáka ch'án, a ntá Dios la mé kjuínchek'ánkí ch'án tí nkehe a.

⁷ Méxr̄a tí nkexro k'ueñkaxin la ko tí nkexro tjáka nt̄a la kánhyó tjetóan kixin Dios mé chón̄ta kaín kjuachaxin la jehe ch'án nchek'ánkí kaín nkehe síin.

⁸ A ntá tí sín t'enk̄a la ko tí sín tjáka nt̄a la ó jnkokón ch'e sín xr̄, a ntá Dios mé tsjenkehe sín jnkojnko tí xr̄ kjuích'e sín.

⁹ Méxr̄a jeheni mé jnkokoá ch'ehe ni Dios xr̄, a ntá jahará mé éxí tí nont̄ee Dios, ntaha ch'e ch'án xr̄, la ko kjaxin jahará mé tí nchia tjech'éna ch'án.

¹⁰ Janhan mé tí maestro ch'éna nchia kixin Dios kjuanjon kjuachaxin tsjaké tí xr̄ xrankíxixín, a ntá í jnko nkexro sich'éna nchia chrítaón tí xr̄ a. A ntá jnkojnko nkexro t'ichjánxin ntoá chrókjuich'éna sín nchia chrítaón tí xr̄ a,

¹¹ kixin kohya ninkexró tsjacha tsjak'e í jnko xr̄ xrankíxixín tí nchia a kixin táha la ó tsíkjixin tsík'óna, kixin Jesucristo tíha.

¹² A ntá chrítaón tíha mé tsjacha sich'éna chojni nchia tsík'óna chica oro, la ko chica plata, la ko xr̄ náxrjón tjete, la ko inta tabla, la ko kanj, la ko ntaxro.

13 Na mé tsonoxín nkehe tí xrạ kjuích'e jnkojnko chojni tió tsi tí yaon tsjixixín. Kíxin tí yaon a mé tsi xrohi. Ạ ntá tí xrohi mé tsjakoxin nkexéhe tí xrạ tsoche la ko nkexéhe tí xrạ tsochehya.

14 Ạ ntá tí jnkojín chojni kjuích'éna ijnko nchia tsochehya la mé tsjacha ch'án tí xrạ kjuích'e ch'án.

15 Ạ ntá tí chróche tí nchia kjuích'éna ijnko chojni, ntá chrók'uitjayan kuenté. Ạ ntá tí nkexro kjuích'éna nchia la tsaá éxí yóhē chrókuinkéhe ch'án xrohi.

16 ¿Á noahyará kíxin jahará kaín rá na mé ijnko n̄inkoē Dios la ko Nchakuen Dios mé chóna asánrá?

17 Ạ ntá jnkojín nkexro tjinkaon ts'óxíka tí n̄inkoē Dios na mé Dios mé sinchek'itjayan tí nkexro xikaha sich'e kíxin tí n̄inkoē Dios la tjóá tíha. Ạ ntá tí n̄inko a mé jahará tíha.

18 Ninkexró chrókjuenkayáxin kíxin imá nohe. Tí jnkojínrá tónhen asánrá kíxin imá nohará éxí nohe chojni chjasintajni ó, na ntá chrókjanrá chrók'ónará éxí chojni noehya kíxin ntá chrók'uitjára chrók'ónará ijnko chojni chaxín nohe.

19 Tí nkehe nohe tí chojni chjasintajni la mé ijnko nkehe l̄ontj̄ t'ikon Dios. Ạ ntá ntáchro tí xroon itén Dios tsíkjin sín ósé kíxin: “Tí nkehe tsík'itjá sín ch'iyaxín sín la tíha mé tsokjan ts'enxín sín.”*

20 La ko kjaxin ntáchro xroon itén Dios kíxin: “Ìnchéni la ó nohe ch'án kíxin kaín nkehe tjenkayáxin tí sín ntáchro sín kíxin imá nohe sín la mé ijnko kjuaxrexinkaon l̄ontj̄ tíha, ichro Dios.”†

* 3:19 Job 5.13 † 3:20 Salmo 94.11

21 Méxra chrókjuinchehnkehyará jahará kixin chréhérá ijnko chojni imá nohe, kixin kaín xín nkehe síin la kuèntará jahará,

22 mé janhan Pablo, la ko ch'ín Apolos, la ko ch'ín Pedro, la ko tí chjasintajni, la ko tí kjuachón, la ko tí kjuach'én, la ko tí nkehe sítónhen jie, la ko tí nkehe tsonhen chr'éxin, la kaín la kuèntará tí jahará.

23 A ntá jahará la Cristo mé t'ayakonhanrá. Kixin Cristo la jehe ch'án la mé kuènte Dios.

4

Tí xra kjuích'e tí sín kjueyá Ìnchéni

1 Jahará chrók'uikonrá tí jeheni éxí chojni ch'ehó Cristo xra k'uáyéheni tí xra tjakoni tí nkehe kuènte Dios ninkexró k'uénoehya.

2 A ntá ijnko chojni k'uáyéhe xra ts'etōan chrókjuakoxin kixin jína ch'án la ko jína ch'e ch'án xra.

3 A ntá janhan tóxakonnahya tí nkehe chróntáchorá jahará chrókjuanchiará jie tí janhan kixin tí xra t'aha Dios, la ko kjaxin tóxakonnahya tí nkehe chróntáchro í so chojni chjasintajni, chrókjuanchia sín jie tí janhan. Kjaxin janhan la tékahya jie asenná.

4 Kjánchó janhan tjenkayáxinhya kixin chonta jie. Kjánchó jehya xikaha tsontáxrjan kixin Dios t'ikon kixin chontahya jie janhan. Náhí. Jehe Ìnchéni mé tsotsjehe ch'án nkehe tí jie chonta janhan.

5 Méxra naxa kjuixrakáhya yaon chrókjuinchekitōexínrá ichrén jie. Chonhénrá tí tsi Ìnchéni kixin jehe ch'án mé sinchenoxín ch'án kaín tí nkehe síimá ti sítié, la ko sinchenoxín ch'án kaín

xín nkehe imó tjenkayáxixín asén chojni. A ntá Dios mé tsjanjon ch'án tí nkehe tsjacha jnkojnko chojni.

⁶ Kíchóni, nixjahará tí nkehe i kixin jína chrók'uejorá jahará ntá xikaha kjuıntayóaxian éxí ch'ín Apolos la ko éxí janhan kixin chrók'uitjará kixin chrókjuenkayáxinrá jehó tí nkehe tsíkjin sín ósé, kixin nijnko nkexro chrókjuinchehnkehya kixin chréhe sín ijnko chojni, a ntá tsochóntehya sín kjuasáyé tí íjnko chojni.

⁷ ¿Méxra nkexro ntá chro kixin jahará antsí tje-toanrá? ¿Xá nkehe chontará naxa kjuanjonhya Dios kixin? Tí kjuanjon Dios kaín nkehe chontará, ¿ntá nkekuente nchehnkerá kixin jahórá tsíkjéyará tíha?

⁸ Jahará tónhanrá kixin imá rícorá. Na mé chaxín chontará kaín xín nkehe tjenkayáxinrá. Ntá jie tónhen asánrá éxí ijnko rey, la í t'ichjánxianhyará ninkehó tí jeheni kixin naxa chrókjuinkitsani. Tí chrókóchaxín chrók'ónará ijnko rey chaxín ntá kjaxinni chróchóntani kjuachaxin chrók'ueñoanni.

⁹ Ntá tónhen asenná kixin jeheni chojni kjueyá Ìnchéni mé kjuanjon Dios kixin jeheni chrókjuixixín chrók'uejóni éxí chojni kujtonhenni kixin noxín chrók'uenni ts'ikon kaín xín chojni chjasintajni la ko ts'ikon tí sín ángel kjaxin.

¹⁰ A ntá jeheni tinkáchónkini Cristo, a ntá xikaha t'ikon sín tí jeheni éxí chojni lontí. A ntá t'ikon sín tí jahará éxí imá nohará. Jeheni la éxí chóntahyani kjuachaxin, a ntá jahará la éxí imá chontará kjuachaxin. Jeheni la tjikosáyehyani sín. A ntá jahará la imá tjikosáyahará sín.

11 A ntá kjónté naxa jie jeheni t'enxínni kjinta, la ko t'enxínni ntá, la ko chóntahyani ikéni, la ko nínkakohenni chojni, la ko chóntahyani nkerí ts'ejóni.

12 La ko tóxrjéni kixin itjani ch'exínni xra. A ntá tió t'ántaxínhinni sín la tjancheheni Dios kixin sincheyaon ch'án tí jehe sín. La ko tió chónkíhi sín tí jeheni la tónínkakuenhyani sín.

13 Tió t'ántaxínhinni sín la jnkojína tjateheni tí jehe sín. T'ikon sín tí jeheni éxí chjinínó ntihi chjasintajni, na mé éxí ijnko nkehe ninkehó sínkíhya la ko mé xíkaha naxa sítónhen tí yaon jie.

14 Ikjian tíhi na jehya kixin chrókjujntasuàhará. Náhi. Tjínkavan chrókjujntaxráxinkáonrá kixin éxí xjanna t'íkuan tí jahará, tjuàhará.

15 Kjónté chróchontará ite mil chojni chrókjuakohará nkexrí tjen Cristo la chontahyará itsjé it'ará. Ntá janhan mé k'óna it'ará tí jahará tió kuítekáonrá Cristo Jesús kixin kjuákohará tí tan jina tsaáxinni.

16 Mé xíkaha xrjanóahará kixin chrókjuákoxinrá éxí tí janhan.

17 Méxra kuétuanhan tí ch'ín Timoteo kixin tsjiji ch'án ntiha. Na mé éxí xjanna t'íkuan tí jehe ch'án, tjuaha ch'án, kixin kjuákoha ch'án ntá kuítekaon ch'án Inchéni ntá xráxín jina ch'e ch'án xra. Ntá tsjiji ch'án sintaxraxinkáonrá ch'án nkexrí tjákoxian tí ntje Cristo éxí xráxín tjákua kaín xín njnko t'atsínka tí janhan.

18 Ntá iso tí jahará imá ihnkerá kixin tjenkayáxinrá kixin chaxínhya chrókjuasántsjahará.

19 A ntá tjoka chrókjuasántsjahará tí chaxín

xikaha tjinkaon Ìnchéni. A ntá jehya jehó tí nkehe nixja tí sín xriko kjuahnke mé chrókuinhan. Náhí. Na mé ts'íkuan á chaxín chóna sín kjuachaxin kixin xikaha nixja sín.

²⁰ A ntá tí kjuachaxién Dios la jehya tí nkehe tsonixjani ó. Náhí. Tí tjakoxinni la tí kjuachaxién Dios.

²¹ ¿Nkehe tjinkáonrá tí jahará, kixin á chrókjuasán chrókjuintakjasótiará? o ¿á tjinkáonrá kixin jnkojína chrókjuasán?

5

Tsitoxín ijnko jie tjachehe kíchó chojni

¹ ¿Á chaxín tsík'ikon sín kixin tí tjejorá ntiha la ijnkorá mé chontará nájoanrá éxí ichjiánrá? Tíha mé ijnko jie jie, la mé kjónté tí sín chónhya Dios la xikahya ch'e sín.

² A ntá kjónté xikaha tsíkónhen la imá ihnkerá. Íchá jína imá chrók'uavará. A ntá tí xikaha ch'e ijnko chojni ntá chrókuétuenhénrá ch'án sáchrókjui ch'án, chrók'uejokoahyará ch'án ntiha.

³ A ntá ntáxrjan janhan kjónté tjenhya cuerpo kuèntana tí tjejorá ntiha la tí tjenkayáxian la ntaha tjèn éxí chrókjuak'é janhan, ntá t'akjénxian ihnje Ìnchéni Jesucristo la ntáxrjan kixin ó kjuixin kjuenkayáxian kixin nkexrí chrókjuasóte tí ch'ín xikaha tsík'ich'e.

⁴ Tió tsojnkotsérá kaín rá ntiha la éxí koyá tsjak'é ntiha la kjánchó nchakuennà ó la ko koí tí kjuachaxién Ìnchéni Jesús ts'ejókoará ntiha.

⁵ A ntá tí ch'ín a la nchek'ayéhérá tí ch'ín Tsochren kixin tsjasóte tí cuerpo kuente ch'án. Ntá tió tsokjan Ìnchéni mé tsaá asén ch'án.

⁶ Jahará chrókjuìnchehnkehýará kixin tí nkehe tsíkónhen ntiha. ¿Á noahýará nkehe ntáchro sín, kixin tí ch'o a mé tjiko intsíkoá tí xroan nchek'ánkí niotja, ntá kjónté la tsosán kaín tí ch'o?

⁷ Méxra chrókuakítsjerá ntója kaín tí xroan ntaxin nchek'ánkí niotja, kixin ntá jahará ts'ejorá éxi niotja tsík'óna ch'o nixin tsíkjikohya xroan nchek'ánkí niotja. Éxi niotja ine sín tí yaon pascua, mé jahará tíha. Kixin jehe Cristo, éxi ijnko kolélo t'óyán sín tí yaon pascua, mé k'uenyákonhenni ch'án.

⁸ A ntá chrókjuasinni tí kia a la kaín asénni chróxaxinkaonni, tíha la éxi tí niotja chóntahya xroan nchek'ánkíxin. La jehya kixin chrókjuasinni tí kia naxa chróchóntani kjuanínkaon kixin táha la yóhe tí xroan ntaxin nchek'ánkí tí niotja a.

⁹ A ntá í jnko xroon chr'anhánrá k'uéntáxrjan kixin ninkehó chrók'uítóhyará tí sín tjasin jie chóna chojni chjin ókjé.

¹⁰ Ntá jehya kixin kuétuanhanrá kixin chrók'uítóhyará tí sín chjasintajni tjasin jie chóna chojni chjin ókjé, la ko tí sín tjinkaon jehó sín tsochóna itsjé nkehe, la ko tí chojni teé, la ko tí sín tinkáchónki tí nkehe tsíkjanoya. Náhi. Tí xikaha chrókjuich'erá la t'ichjánxin chrók'uaxrxéxinrá tí chjasintajni.

¹¹ Méxra ó kuétuanhanrá kixin chrók'uítóhyará ninkehó jnkojín chojni ntáchro sín kixin kichó ni tí jehe sín, ntá naxa tjasin sín tí jie chóna sín chojni

chjin ókjé, la ko tjinkaon sin jehó sín tsochón̄ta sin itsjé nkehe, la ko tí sín nax̄a tinkáchónki sín nkehe tsíkjanoya, la ko tí sín nax̄a tinkáchónki kjuach'ia, la ko tí sín tókoan, la ko tí sín teé chichaon, la mé tí chojni x̄ikaha ch'e la chrókjontekoahyará sín.

¹² Jehya xr̄ana chrókjuintakitoxián tí ijié tí sín jehya kuènte n̄inko ntiha. A ntá tí xr̄a kuèntará jahará kíxin chrókjuinchekitoxinrá tí ijié tí sín kíchó ni tójnkotsé n̄inko ntiha.

¹³ A ntá Dios mé sinchekitoxín ch'án ijié tí sín jehya kuènte n̄inko. Méxr̄a, takítsjekjanxinrá tí ch'ín jínahya kjuasin jie tí tjejorá ntiha.

6

Chrókjuikjanchahya sín jie nkayakon tí ch'ín juez tinkáchónkihya Ìnchéni

¹ A ntá jnkójn̄rá chrókjuánjonkoará kíchuará chrókjuikjanchahyará jie nkayakon tí ch'ín juez tinkáchónkihya Ìnchéni. Íchá jína chrókjuirá chróchenkará tí sín tinkáchónki Dios.

² ¿Á noahyará kíxin tí sín tinkáchónki Ìnchéni mé sinchekitoxín sín ijié kaín xín chojni chjasintajni? A ntá x̄ikaha sinchekitoxinrá ijié kaín xín chojni chjasintajni, ¿ntá nkekuènte tsjachahyará sinchekitoxinrá kjónté ijnko jie ntsí?

³ ¿Á noahyará jahará kíxin kjónté tí sín ángel tsotsjeheni nkehe tí xr̄a kjuích'e sín? A ntá ijnko nkehe intsí ntihyó, la ¿á xitjahya chrókjuásiyóxinrá?

⁴ A ntá x̄ikaha chrókjuánjonkoará kíchuará, ¿ntá nkekuènte tjíkjanchiará jie nkayakon tí sín tikínixinhya kuènte n̄inko?

5 Ntáxrjan xikaha kixin chrókjuintasuhará. ¿Xá kohya ninkexró kichó ni ntiha chóna kjuaxrexinkaon jína tsjacha sincheyóxinhin ijie kichó ni?

6 Jahará jnkokoá kichuára ntá tjanjonrá, la ko kjaxin sátjijkanchiará jie nkayakon tí ch'ín juez tinkáchónkihya Ìnchéni.

7 Kjónté ijnko jie ntsí ntá imá tjanjonkoáxinrá kichuára; tíha mé t'óna ijnko jie jie. Íchá jína chrókóninkákonhyará kixin tí nkehe jínahya kjuít'ahará sín. Íchá jína chrókuítóhérá sín kjónté tsaáhará sín.

8 Kjánchó kjaxin jahará ntoáhya tjejoch'erá kixin kjónté jnkokoá kichuára la tjeherá sín.

9 ¿Á noahyará kixin tí sín jínahya ch'e la ts'áyèhya sín kjuachaxin kuènte Dios? Chrókuítóéhyará chrókjuit'áyahará sín, chrókónohará kixin tí sín tjasinko jie tí chojni chjin ókjé, la ko tí sín tinkáchónki sín nkehe tsíkjanoya, la ko tí sín tjachehe kichó sín, la ko tí chojni t'ò chjin, t'ò ntoa, la ko tí sín jnkokón ntoa sín tóxrjínhin kichó sín,

10 la ko tí xichee, la ko tí sín tjinkaon sín jehó sín tsochóna sín itsjé nkehe, la ko tí sín tókoan, la ko tí sín ch'éna kjuach'ia, la ko tí sín ixri ch'ia sín kixin tsjacha sín chichaon, na mé ts'áyèhya sín kjuachaxin kuènte Dios.

11 Xikaha k'uéjorá isorá senó. Ntá jie ó k'uíjmára, kjuínchetjóará Dios, ntá ó xíka ijjárá kjuachaxin ihnjé Ìnchéni Jesucristo la ko kjuachaxin kuènte Nchakuen Dios.

Tí cuerpo ó tsíkótjóá

12 Siín kjuachaxin kaín nkehe chrókjuít'a, kjánchó iso nkehe la ó chónkó. Siín kjuachaxin kaín nkehe chrókjuít'a, kjánchó chrókuítóahya ninkehó nkehe chrók'uetuanna.

13 Chaxín tí nkehe ntáchro sín kixin ó k'óna tí nkehe sineni kixin tseeni ó sátsji, la ko ó tsík'óna tseeni kixin ts'inka nkehe sineni. Kjánchó Dios mé sinchek'itjáyan yóí tíha. A ntá k'ónahya tí cuerpo kuènteni kixin chrókjuasixínni jie. Náhí. Tí cuerpo kuènteni mé k'óna kixin tsochjéxínni Ìnchéni kjuasáya, la ko jehe Ìnchéni mé ts'ayakonhen ch'án tí cuerpo kuènteni.

14 Méxra Dios mé kjuínchexechón Ìnchéni, mé xikaha sinchexechónxinni ch'án tí kjuachaxin kuènte ch'án.

15 ¿Á noahyará kixin jnkojnko cuerpo kuèntará mé it'ò tí cuerpo kuènte Cristo? ¿Á chrókjuít'a janhan kixin it'ò tí cuerpo kuènte Cristo chrók'óna it'ò cuerpo kuènte ijnko chojni chjin ch'iehe nchónhya chojni ntoa? Méxra kjá náhí.

16 ¿Á noahyará kixin tió ijnko chojni ntoa chrókuakja ijnko chojni chjin chóna nchónhya chojni ntoa, ntá tí jehe sín yóí sín chrók'óna sín jnkokoá cuerpo? Kixin ntáchro xroon itén Dios kixin: “Yóí sín la ts'óna sín jnkokoá chojni.”*

17 A ntá tí jnkojín chojni tinkáchónki Ìnchéni, ntá jehe la ko Ìnchéni mé ts'óna jnkokoá.

18 Méxra chrókuítóhéra chróchontahyará chojni chjin ókjé. Tí í so jie tjasin chojni na mé jehya tí cuerpo kuènte sín nchekjasóte sín. A ntá tí sín

* 6:16 Génesis 2.24

tjasinko jie chojni chjin ókjé la mé nchekjasóte sín tí cuerpo kuènte sín.

¹⁹ ¿Á noahyará kixin jnkojnko cuerpo kuèntará mé éxí ijnko nínko itjen Nchakuen Dios kjuanjon ch'án k'uayéhérá, la ko chontará tí Nchakuen ch'án tjóá? Jahará la jehya ìnché tí cuerpo kuèntará

²⁰ kixin jahará la tjete k'uénaxínrá Dios. Méxra chjeéxinrá kjuasáyé Dios tí cuerpo kuèntará la ko tí nchakónrá kixin yóí la kuènte Dios.

7

Chenka ch'án tí sín tsíkótehe kixin nkexrí chrók'uejó sín

¹ A ntá jie tsjataha tí nkehe tsíkjinrá kjuanchankinará, na mé ntáxrjan kixin chaxín chrókójina kixin tí chojni ntoa chrókuakjahya ichjién.

² Kjánchó tí xikaha imá tjinkaon sín tsochónta sín itsjé chojni chjin tsjasinko sín jie, la íchá jina jnkojnko chojni ntoa chróchónta jnkojnko ichjién kuènte la ko jnkojnko chojni chjin chróchónta jnkoinko xì kuènte.

³ Tí chojni ntoa la ko tí chojni chjin chrókuinchesteyéhe sín kichó sín.

⁴ Tí chojni chjin jehya ìnché tí cuerpo kuènte tjan, na mé kuènte xì tjan. Ntá kjaxin xikaha tí chojni ntoa la jehya ìnché tí cuerpo kuènte ch'án, na mé kuènte ichjién ch'án.

⁵ Chrókuincheniéhyará kichuárá, jehí jnkokoá chrókuenkayáxinrá yóirá kixin tsochontehérá iso yaon kixin ntá kaín asánrá chrónixjehérá Dios. Ntá tsjixin ntá chrókóchjineherá kichuárá inaá kixin

chrókuitoéhyará kixin ch'ín Tsochren chrókjuacha chrókjuachroerá ch'án chrókjuásinrá jie.

⁶ Kaín tíhi tjonkará kixin tsonohará kixin síin kjuachaxin xikaha na kjánchó jehya kixin xikaha tétuanhanrá.

⁷ A ntá janhan ntáxrjan kixin chrókójína kixin kaín rá chojni ntoará chrókóyóhará éxi tí janhan. Kjánchó Dios chjéhe kjuachaxin jnkojnko chojni, la iso la ijnko nkehe tjenkayáxin, la í so la í jnko nkehe tjenkayáxin.

⁸ A ntá tí sín naxa tóteehya la ko tí chojni tsíkók'án na ntátjan sín kixin chrókójína kixin xikahó chrók'uejó sín chrókóteehya sín éxi tí janhan xikaha.

⁹ Kjánchó tí chrókjuachahya sín tí tjak'e asén kichó sín, naxa chrókjuasin sín jie, ntá íchá jína chrókótehe sín kixin jehya jína kixin jnkochríxín chrókjuak'ó asén sín.

¹⁰ A ntá jahará ó tsíkjixin tsíkótahará, la tétuanhanrá tíhi: a ntá jehya kixin kjuachaxin kuèntana tétóanxínrá. Náhí. Kjuachaxin kuènte Ìnchéni mé tétóanxínrá kixin tí chojni chjin chrókjuákehya xii.

¹¹ A ntá tí chrókjuákehje ijnko chojni chjin tí xii, ntá xikahó chrókuitohe tjan jehó tjan la ko chrókójína chrókóyóxin, chrókjuìnhin tí kjuanínkaon kixin tí kjuákehje kichó sín. Kjaxin xikaha tí chojni ntoa la chrókjuákehya tí ichjién.

¹² A ntá tí nkehe tétuanhan tí í so sín jaí la kuèntana janhvàn, jehya kuènte Ìnchéni, kixin tí tjen ijnko ch'ín kichó ni chóna ch'án ichjién ch'án tinkáchónkihya Ìnchéni, na kjónté naxa

tjinkaon tjan chrókjuak'eko tjan tí jehe ch'án la chrókjuákehya ch'án tí jehe tjan.

13 La ko tí tjen ijnko tjan kíchó ni chón^{ta} xì tjan tinkáchónkihya Ìnchéni, ntá kjónté naxa tjinkaon ch'án chrókjuak'eko ch'án tí jehe tjan, ntá chrókjuákehya tjan tí jehe ch'án.

14 Kíxin tí xì tjan tinkáchónkihya Ìnchéni ntá jie ó kótjóá ch'án kíxin tí ichjién mé tinkáchónki Dios, la ko tí ijnko tjan tinkáchónkihya Ìnchéni ntá jie ó kótjóá tjan kíxin tí xì tjan mé tinkáchónki Dios. A ntá tí xikahya, la tí xjeen sín chrókótjuáhya, na ntá jie la mé ó kótjóá tí xjeen sín.

15 A ntá tí ch'ín ntoa o tí tjachjin tinkáchónkihya Ìnchéni tjinkaon chrókjuákehé kíchó sín, la ája nohe sín tjákehé kíchó sín, kíxin Dios tjinkaon kíxin kjuaxróxin chrók'uejorá.

16 Jahará chojni chjinrá, ¿nkexrí chrókónohará kíxin nkexrí chrókuaá xiará? La ko jahará chojni ntoará, ¿nkexrí chrókónohará kíxin nkexrí chrókuaá ichjiánrá?

17 A ntá jnkojnko chojni chrók'uejó sín éxí tsíkjanjon Ìnchéni kjuachaxin tsík'áyéhe sín, la ko éxí tí k'uejó sín tió k'uíyehé sín Dios, kjánchó chrókuítóehya sín tí jehe ch'án. Mé xikaha tétuanhan kaín tí njnko.

18 Tí chrók'uíyehé Dios ijnko ch'ín chón^{ta} xroye, ntá xikahó chrókuítóhe ch'án. A ntá tí chrók'uíyehé Dios ijnko ch'ín chóntahya tí xroye a, ntá kjónté chrókuahya ch'án tí xroye a.

19 Na mé tjetuanhya á chón^{ta} chojni tí xroye o á chóntahya chojni tí xroye. Na mé tí nkehe tjetuan kíxin chrókjuinchexiteyeheni tí nkehe k'uetuan

Dios.

²⁰ Chrók'uejóni jnkoinkoni éxí k'uejóni tí k'uíyeheni Dios.

²¹ A ntá tió Dios k'uíyaha jaha, kjónté jaha ijnko chojni ch'exón xra, ntá chrókóxakuanhya kjónté xikahó tjech'e xra. Kjánchó tí chrók'uitjá tí tsaáxian la chrókuákjá tíha.

²² Kíxin tí nkexro kjuích'exón xra tió k'uíyehé Ìnchéni kíxin tsinkáchónki ch'án, la mé jie chóna ch'án tí kjuachaxin tjanjon Ìnchéni. Kjaxin tí nkexro k'uítuenhya tió k'uíyehé Ìnchéni la mé jie mé ch'ehe ch'án xra Cristo.

²³ Dios imá tjete k'uenaxín ch'án tí jahará. Méxra chrókjuánjonhyará kjuachaxin kíxin ókjé chojni chrók'óna ìnchára.

²⁴ Méxra kichó ni, éxí k'uejorá tió k'uíyahará Dios kíxin tsinkachónkirá ch'án, la xikahó naxa chrók'uejorá jie kíxin chontará Ìnchéni tsinkitsa.

²⁵ A ntá tí chojni naxa tótēehya sin na mé janhan chontahya nkehe kuente Ìnchéni chrókuétuanhan sín. Kjánchó tsoxrjanka tí nkehe tjenkayáxian janhvàn, a ntá chrókuítekáonrá tí janhan kíxin kuikonóna Ìnchéni.

²⁶ Mé xikaha tónna kíxin chrókójina kíxin jnkoinko chojni chrókuítóhe sín éxí tjejó sín chrókótēehya sín, kíxin ijie la kjuaxróxinhya tjejóni.

²⁷ A ntá tí chontará ichjiánrá ntá chrókjuakeéhyará tjan. A ntá tí chontahyará ichjiánrá ntá íchá jina chrókjuéyáhyará.

²⁸ Kjánchó tí chrókótahará la jehya jie tíha, la ko tí chrókótehe ijnko tjan tjarisoá la kjaxin jehya jie. A ntá tí sín tsíkótehe la tsochóna sín

kjuaxikaon, mé xikaha janhan chrókjuínkítsa sín kixin chróchóntahya sín kjuaxikaon.

²⁹ Mé xikaha tjétjonkará kichó ni kixin tsjéhya yaon naxa t'itjáyan tsokjan Ìnchéni. Mé xikaha tí chojni ntoa chóna ichjién sín, la antsí tjetotan saxín chróxraxinkaon sín Ìnchéni, la ntá chr'éxin chrótjuèhe sín ichjién sín.

³⁰ A ntá tí sín tsjánka la chrók'uejó sín éxi chrótsjánkahya sín. La ko tí sín chéhe la chrók'uejó sín éxi chéhya sín. La ko tí sín t'ena nkehe la chrók'uejó sín éxi chóntahya sín tí nkehe tsík'ena sín.

³¹ La ko tí sín kjuacha nkehe siín chjasintajni la chrók'uejó sín éxi ninkehó chróchóntahya sín, kixin kaín nkehe t'ikonni chjasintajni ntihi mé tjoka tsjeje.

³² Tjínkakhya kixin jahará chrókóxakonhanrá. Tí ch'ín ntoa chóntahya ichjin antsí má tóxakonhen tí xra kuènte Ìnchéni chrókjuinchexiteyéhe ch'án tí nkehe tóxrjínhin Ìnchéni.

³³ A ntá tí ch'ín tsíkótehe antsí tóxakonhen tí nkehe siín chjasintajni kixin xikaha mé sinchechéhe ch'án ichjién ch'án.

³⁴ Ókjé tjenkayáxin tí tjan tsíkótehe la ko tí tjan tsíkóteehya kixin tí tjan tsíkóteehya la antsí má tóxakonhen tjan tí xra kuènte Ìnchéni kixin tjinkaon tjan kixin Dios sinchetjóá tí cuerpo kuènte tjan la ko tí asén tjan. A ntá tí tjan tsíkótehe mé tóxakonhen tjan tí nkehe siín chjasintajni kixin xikaha sinchechéhe tjan xì tjan.

³⁵ Tjétjonkará tíhi kixin tjínkavan kixin jína chrók'uejorá, jehya kixin xikaha

chrókuétuanhanrá. Náhí. Tjínkavan kixin kjuasáya chrók'uejorá jnkojína la jehó Ìnchéni chrókjũich'eherá xra.

³⁶ A ntá jnkojínrá tjenkayáxinrá kixin chrókójína chrókótehe ijnko xjaanrá chjin kixin ó tsícha tjan, la ntá tí xíkaha la ó nchoxon tsotehe tjan na mé jehya jie.

³⁷ A ntá jnkojínrá tjinkáonrá kaín asánrá kixin chrókóteehya xjaanrá chjin la kjaxin tjan xíkaha tjenkayáxin tjan la antsí jína tíha.

³⁸ Mé xíkaha tí tjtóhérá xjaanrá chjin kixin tsotehe tjan la ó nchoxon. La ko kjaxin tí tjinkakonhya tjan kixin chrókótohe tjan na mé antsí jína tíha.

³⁹ Tí tjan tsíkótehe mé k'uítuenxín tjan kjuachaxin tí ley kixin tsjak'eko tjan tí xì tí naxa tjechón ch'án. A ntá tí chrók'uen ch'án ntá tsochónta tjan kjuachaxin tsotehe tjan ínaá tí nkexro tsoxrjínhin tjan, kjánchó jehó ijnko nkexro tinkáchónki Ìnchéni mé chrókótehe tjan.

⁴⁰ Kjánchó antsí chrókóchéhe tjan tí jehó tjan chrókuitohe tjan, tí í chrókóteehya tjan. Méxra xíkaha tjenkayáxian janhan la ko kjaxin tónna janhan kixin chonta janhan tí kjuachaxin kuènte Nchakuen Dios.

8

Tí nkehe ine sín tjokehe sín tí nkehe tsíkjanoya

¹ A ntá jie tsoxrjanka kuènte ti ko its'en tjokehe sín tí nkehe tsíkjanoya. Na mé chaxín kaín ni noheni tíha. Ntá chrókóxakonhenni kixin tí chrók'uitjani má ntá chrókóhnkeni má. Antsí

tjetoan chrótjuèheni kíchó ni kixin xikaha antsí chrókuinkáchónkini Ìnchéni.

² Tí jnkójín nkexro ntáchro kixin nohe ch'án, na mé chaxínhya tíha la naxa t'itjáyán tí nkehe chrókónohe ch'án.

³ A ntá jnkójín nkexro tsotjuèhe Dios la Dios tsochóxin tí jehe ch'án.

⁴ A ntá tí chrókjóneni nto tsíkjokehe sín tí nkehe tsíkjanoya, la ó noheni jína kixin tí nkehe tsíkjanoya la t'etuánhya ninkehó ntihi chjasintajni, la ko ó noheni kixin jnkokoá Dios tjen.

⁵ A ntá síin nkehe nchek'in sín díos nkaya nkajní la ko chjasintajni na, kjánchó tí xikaha la kjá chrók'uixin itsjé díos la ko itsjé ìché sín.

⁶ A ntá jeheni chóntani jnkokoá Dios na mé It'éni tíha, la jehe ch'án mé kjuích'éna ch'án kaín xín nkehe la ko tjejóni kixin chrókjuinchexiteyéheni ch'án. La ko kjaxin itjen jnkokoá Ìnchéni Jesu-cristo, na mé kaín xín nkehe síin la kjuích'éna ch'án la ko kjaxin tí jeheni tsíkjich'éna ch'án.

⁷ Kjánchó kénhya chojni nohe sín tíhi. Na mé iso sín ó kuèhen sín kuinkáchónki sín tí nkehe tsíkjanoya, a ntá jie tió ine sín tí nkehe tsíkjokehe chojni tí nkehe tsíkjanoya na mé tjenkayáxin sín kixin ó tsík'áyéhe ijnko dios, kixin naxa noehya sín má, ntá ntáchro sín kixin ó kuámá sín tí jie kuènte tí nkehe tsíkjanoya.

⁸ Ó noheni chaxín kixin jehya kixin chrókóxrjnhin Dios tí jeheni kixin tí nkehe jína chrókjóneni. Náhí. Jehya kixin chrók'uejóxinni jína kixin tí nkehe chrókjóneni na ko tí nkehe chrókjónehyani.

⁹ Méxra titoéhyará kixin tí kjuachaxin chontará sinterá kaín xín nkehe mé xikaha chrókjuachroe ijnko chojni kichó ni naxa noehya jína tinkáchónki Ìnchéni ntá tíha chrókjuasixín sín jie.

¹⁰ A ntá tí chrók'uikon sín kixin jahará ó nohará jína ntá ts'ejorá sinterá nkehe nkaxenhen ijnko ninkoe nkehe tsíkjanoya, ntá tí chojni kichó ni naxa noehya jína ntá chrók'uikon sín xikaha ntá kjaxin jehe sín tsotjinkaon sín sine sín tí nkehe tsíkjokehe chojni ijnko dios chaxínhya.

¹¹ A ntá jahará ó nohará jína ntá xikaha tjejoch'erá itsará sìnchek'itjáyanrá tí kichó ni naxa noehya jína tinkáchónki Ìnchéni kixin Cristo k'uenyákonhen tí jehe ch'án kjaxin.

¹² Méxra tí xikaha chrókjuich'erá la chrókjuásinhínrá jie tí sín kichó ni naxa tinkáchónkihya sín Ìnchéni jína, na mé xikaha kjaxin chrókjuásinrá jie chrókuitekákuenhyará Cristo.

¹³ Méxra tí xikaha chrókjuasixín jie ijnko kichó ni kixin tí nkehe chrókjóneni, ntá íchá jína chrókjónehyani nto ínaá kixin xikahya ntá chrókjuichroexín tí sín kichó ni ntá chrókjuasixín sín jie.

9

Tí kjuachaxin chóna ijnko apóstol

¹ Chaxín janhan la kohya nkexro t'etuanna kixin janhan la chonta kjuachaxin kixin ijnko apóstol tsíkjejá Ìnchéni kixin janhan k'uikuān ch'án. Jahará mé tjákoxinrá tí xra kjuít'a kuènte Ìnchéni.

² Iso sín ntáchro sín kixin tjátsoanhyana sín kixin ijnko apóstol tsíkjeýá Ìnchéni. Ntá jahará kaín rá mé chrókjuátsoanrá tí janhan kixin tí kuítekáonrá kuinkachónkirá Ìnchéni mé xíkaha tjákoxinrá kixin chaxín janhan tsíkjeýána ch'án.

³ Méxra janhan jína chrókjuátaha tí sín xritjontana, chróntáxrjan kixin:

⁴ Janhan chonta kaín kjuachaxin chrók'uayáha nkehe chrókjonè la ko chrók'uia.

⁵ Kjaxin chonta kjuachaxin chróchonta ijnko chojni chjin tinkáchónki Ìnchéni chrók'uajikian éxí chónta tí í so sín tsíkjeýá Ìnchéni, la ko tí sín kichó Ìnchéni, la ko éxí chónta ch'ín Pedro.

⁶ ¿Á tjenkayáxinrá kixin ch'ín Bernabé la ko janhan jehóni chóntahyani kjuachaxin tsítóheni tí xra sich'exínni tjani?

⁷ ¿Nkexro ch'e xra soldado ntá chichakoén ch'án ó chrókuicháxinhin? Nkexro k'uēnkā nta to uva ntá kjónehya ch'án to? ¿La ko nkexro t'ayakonhen kolélo ntá k'uíhya tí tsjen t'énhen sín va?

⁸ Ntáchrohyará kixin janhvàn kjuenkayáxian tíha kixin kjaxin xroon tsíkjin ch'ín Moisés xíkaha nixja.

⁹ Méxra kjaxin ntáchro tí xroon tsíkjin ch'ín Moisés ósé kixin: “Chrókjuéjójáhyará kamposa ir'va koxinta tí tsinkátja va noatrigó tió tsónkéhe sín noa.”* Tíha mé t'axrjexín kixin jehya koxinta ó tóxakonhen Dios.

¹⁰ Náhí. Tóxakonhen ch'án kixin tí jeheni. Méxra xíkaha nixja tí xroon kixin chrók'uejóxinni jína. A ntá tí nkexro kjuínchentá nche la ko tí

* 9:9 Deuteronomio 25.4

nkexro tsónkéhe noa, yóí sín la chróchónhen sín chrók'uáyéhe sín tí nkehe k'óna.

¹¹ A ntá tí k'uenkani tí itén Dios asánrá, la kjá chróchóntani kjuachaxin chrókjuanchaharáni ichrén nkehe t'ichjánxinhinni.

¹² A ntá tí xíkaha í so sín chóna sín tí kjuachaxin tjanchia sín nkehe ts'áyéhe sín, ntá jeheni antsí má chóntani kjuachaxin chrók'uáyéheni nkehe.

Kjónté chóntani kjuachaxin xíkaha la kjuanchahyani nkehe, kjónté kánhyó náxrjón k'uéjóni kixin tjinkakonhyani chrókjuanchiani nkehe chrók'uichjánxinhinni kixin ách'e xíkaha ntá chrók'uinkákonhen tí itén Cristo chrókjuakoni.

¹³ Jahará ó nohará kixin tí sín ch'e xra kùente nínko mé ntaha xránjon nkehe ine sín. La ko tí sín t'óyánxin sín ko tí altar tsochjéhe sín Dios kjaxin ine sín tí ntøe tí ko t'óyánxin sín ntiha.

¹⁴ Méxra xíkaha kjaxin k'uetøan Ìnchéni kixin tí sín ch'e tí xra ó chrónka sín tí tan tsaáxinni na mé tí xra a chrók'uaxrjeníxin tí nkehe chrókjóna sín.

¹⁵ Kjónté janhan síin kjuachaxin xíkaha chrókjuít'a, la xíkahya kjuít'a la ko kjaxin xíkahya ikjian tí xroon i kixin jahará chróchjínará ichrén nkehe. Náhi. Kjónté chrók'uénxian kjinta chrókjuáncháhyará nkehe kixin tjínkakhya kixin ninkexró chrókuakitsjena tí kjuachéhe chonta.

¹⁶ Jehya kixin chrokjuíntahnke chrókjuákua tí tan tsaáxinni. Náhi. Janhan na ó jehí sít'a tí xra a. Nòa tí janhan tí chrókjuákohya tí tan jína chrókuaáxin chojni.

¹⁷ A ntá tí janhván tjínkavan chrókjuákua la xíkahó chrókjuacha janhan. A ntá tí tjákua itén Dios

kíxin xikaha kuítuanna ntá xikahó ntaxiteyá tí xra chjìna Dios.

¹⁸ ¿A ntá nkehe chrókjuacha janhan? Tíha mé chrókjuacha janhan kíxin chrókóchàna má kíxin chrókjuàkua tí itan tsaáxinni la ninkehó chrókjuánchàhya chrókjuacha la ntá tí xikaha la chrókuákjaáhya tí kjuachaxin tí chrókjuàkua.

¹⁹ Méxra kohya nkexro t'etuanna. Kjánchó ó jehí chrókjuít'ahá kaín xín chojni xra kíxin xikaha antsí tsjé chojni chrókjuacha janhan kíxin chrókuitekaon sín Cristo.

²⁰ Ti tjèn tí síin tí sín judío ntayóha éxí jehe sín xikaha janhan kíxin xikaha chrókjuacha jnkojín sín chrókuitekaon sín. Na mé t'axrjexín kíxin tí chrókjuacha iso tí sín nchexiteyéhe tí ley k'uetōan ch'ín Moisés, la t'ichjánxin kíxin kjaxin janhan chrókjuíntaxiteyá tí ley kjónté janhan la xikahya t'etuanna tí ley.

²¹ A ntá tí chrókjuacha jnkojín tí sín nchexiteyèhya tí nkehe k'uetōan ch'ín Moisés la ntayóha éxí tí jehe sín xikaha janhan kjaxin, kjónté chaxín t'etuanna tí nkehe k'uetōan Dios méxra ntaxiteyá tí nkehe k'uetōan Cristo.

²² Tió tjèn tí síin tí sín tienxínhya jína, ntá kjaxin janhan t'óna éxí tí jehe sín kíxin xikaha chrókjuacha jnkojín tí jehe sín chrókuitekaon sín. Méxra ntayóha éxí kaín xín chojni xikaha janhan kíxin xikaha chrókjuacha janhan kíxin chrókuaá iso tí jehe sín.

²³ Mé xikaha kaín tíha tjét'a kíxin chrókuinhin sín tí tan chrókuaáxin sín la ko kjaxinna antsí má chrókjuintayaonna Dios.

²⁴ Jahará ó nohará kíxin tió itsjé sín tsinkáko kichó sín la kjánchó ójnkó nkexro tsjacha tí

tsitonhen nkehe. A ntá jahará xikaha chrókuinkará kixin chrók'uayéhérá tí nkehe chrókutonhanrá.

²⁵ Tí sín tinkáko kichó sín na mé jína t'ayakonhen sín asén sín, títohe sín kaín sín nkehe chrókjuich'ehe sín dañó kixin tjinkaon sín chrókjuacha sín, chrók'uáyéhe sín kjónté ijnko corona tsík'óna kayoa ó tjoka tsoxámá. Kjánchó jeheni ch'eni xra kuènte Ìnchéni kixin ntá ts'áyéheni ijnko nkehe chónhya tsoxámá.

²⁶ A ntá janhan jehya éxí ijnko chojni t'ikonhya chrókuinka. Jehya éxí xrinto ó chrókjuánjonkian.

²⁷ Náhí. Janhan tjánjonkian tí cuerpo kuèntana, tétuanhan kixin jína chrókjuinchexiteyàna kixin tóxakonna kixin chrókjuásian ichrén jie ntá janhan chrókjuachahya kjónté senó kjuákoha itsjé chojni.

10

Tí nkehe t'etōan ch'án kuènte tí nkehe tsíkjanoya

¹ Tjínkavan janhan kixin chrókónohará kichó ni kixin tí sín k'uaxrjeníxinni ósé, kaín sín k'uixinkánkí sín chrínkí tí tjuí, la ko kaín sín k'uátòye sín Ntayaon Kjátse,

² la ko kaín sín k'uéchréhe sín ch'ín Moisés éxí yóhe chrókuikite sín kixin jnkokoá k'uéjó sín tí tjen tí tjuí la ko tí ntayaon la ko kjuínchexiteyéhe sín ch'án kixin jehe ch'án k'uék'etōan ch'án.

³ La ko kaín sín kjóne sín jnkokón nkehe kuixin nkaya nkajní

⁴ la ko kaín sín ik'ui sín jnkokón nkehe kjuanjon Dios kixin ik'ui sín ntá k'uaxrjexín ijnko tjo kjuíncheyaon Dios, na mé tí tjo a la mé t'axrjexín kixin Cristo tíha.

⁵ Kjánchó itsjé tí jehe sín kjuínchechèhya sín Dios, méxrǎ kónínkaon ch'án la tí nteje ó k'uénxin tí sín a.

⁶ Kaínxín tíha kónhen kixin chróxraxinkakonxínni jeheni, chróntáchrohya asènni chrókjuich'eni tí nkehe jínahya éxí kjuích'e tí jehe sín.

⁷ Méxrǎ chrókuinkachónkihyará jahará nkehe tsíkjanoya éxí k'uékinkáchónki iso tí jehe sín, éxí ntáchro tí xroon itén Dios tsíkjin sín ósé kixin: “Kaín sín k'uéjótjǎxin sín kjóne sín la ko ik'ui sín, ntá kjuixin la k'uínkatjen sín la ité sín”.*

⁸ Méxrǎ chrókjuasinkohyani jje chojni chjin ókjé éxí kjuích'e iso jehe sín ntá ik'uén sín, ventitres mil sín, jnkokoá yaon.†

⁹ Kjaxin chrókjuinchekóninkakonhyani Ìnchéni éxí kjuích'e sín ntá ik'uén sín kixin kjónehe sín konche,‡

¹⁰ la ko chrók'uántaxíenhyani Dios éxí k'uántaxínhin tí jehe sín ntá tí ángel kuènte kjuach'én mé kui k'óyán sín.§

¹¹ Kaín tíha kónhen tí sín k'uaxrjeníxinni ósé kixin chrókónoexínni la ko k'óna xroon chrónka xikaha kixin nchexraxinkaonni tí jeheni tjejóni jie kixin í séhya tsjixixín tsjeje chjasintajni.

¹² A ntá tí nkexro ntáchro kixin ntoá tjen na chrókóxakonhen kixin chrókjuichrohya.

¹³ Jahará naxǎ k'uatsínkahyará ninkehó nkehe tí chrókjuachahya chojni chrókónhen. Méxrǎ jahará chróxráxinkáonrá Dios kixin jehe ch'án chrókuítøehya ch'án tí jahará kixin chrók'uatsínkará nkehe imá xrǎ chrókjuachahyará. Méxrǎ tí itsi ichrén nkehe tsonhanrá la

* **10:7** Éxodo 32.6 † **10:8** Números 25.6–9 ‡ **10:9** Números 21.5–6

§ **10:10** Números 16.41–49

Dios tsjinkjtsará ch'án kixin chrókjuachará chrók'uatsínkará tí nkehe chrókónhanrá.

14 Méxra tjuahará jahará kichó ni, la ntá ntáxrjan kixin chrókuítóhérá tí nkehe tsíkjanoya.

15 Nixjahará jahará kixin jahará chojni ó tienxín. Méxra jahórá chrokjuenkayáxinrá kixin á jína tí nkehe ntáxrjan.

16 Tí tjanchiani kjuasáya kixin tí nkehe it'ini na mé kaín ni jnkokoá tjakoxinni tí ijnié Cristo ó k'úitji. La ko tió tóchrít'óni tí niotja ineni, na mé kaín ni jnkokoá tjakoxinni tí cuerpo kuente Cristo.

17 Kjónté nchónhyani jeheni la kaín ni na jnkokoá niotja ineni kixin kaín ni jnkokoá k'ónani cuerpo kuente Cristo.

18 Chrókónohará nkexrí ch'e tí sín chjasin Israel, na mé ine sín tí ko tsíkjokehé sín Dios ntá xikaha tjakoxin sín kixin xikaha tinkáchónki sín.

19 Ntáxrjanhya kixin tí nkehe tsíkjanoya la chóna kjuachaxin, la ko ntáxrjanhya kixin tí nto tsíkjokehé sín tí nkehe tsíkjanoya la antsí chóna kjuachaxin.

20 Náhi. Ntáxrjan kixin tí nkehe tjanjon tí sín chónhya Dios na mé tjokehé sín tí nchakuen tí jínahya la jehya Dios tjokehé sín tíha. Méxra janhan tjínkakonhya kixin xikaha chrókjuich'erá jahará chróxráinkáonrá tí nchakuen tí jínahya.

21 Tí its'ini tí nkehe xraxinkakonxínni ijnié Ìnchéni ntá kjaxin tí chrók'uini tí nkehe xraxinkakonxín sín tí nchakuen tí jínahya la jehya jína tí xikaha chrókjuich'eni chrók'uini. Tí sineni tí nkehe xraxinkakonxínni tí cuerpo kuente Ìnchéni ntá kjaxin tí chrókjóneni tí nkehe xraxinkakonxín

sín tí nchakuen tí jínahya la jehya jína tí xikaha chrókjuich'eni chrókjóneni tí nkehe.

²² ¿A jína chrókjuinchekóninkaonni Ìnchéni ní? ¿Á jeheni antsí chóntani kjuachaxin la ntá jehe ch'án la náhí ní?

Chóntani kaín kjuachaxin kaín xín nkehe na kjónté antsí tjetooan tsotjuèheni kíchó ni

²³ Siín kjuachaxin ichrén nkehe chrókjuich'eni. Kjánchó jehya kixin kaín nkehe la jína. Siín kjuachaxin ichrén nkehe chrókjuich'eni na kjánchó kénhya nkehe chrókjuinkitsa chrókónoheni tí nkehe kuènte Dios.

²⁴ Chrókjuéyáhyará tí nkehe chrók'uejóxínrá jína jahórá. Náhí. Kjaxin chrókjuéyárá tí nkehe chrók'uejóxin jína í so chojni.

²⁵ Chrókjónterá kaín nto sítóxin la chrókjuanchankíhyará ninkehó kixin tí xikaha ntá ntoáhya chrókjuenkayáxinrá,

²⁶ kixin kuenté chjasintajni la kaín xín nkehe siín la kuènte Ìnchéni.

²⁷ A ntá jnkojín chojni tinkáchónkihya Ìnchéni chrók'uíyahará sín kixin chrókjóntekoará sín la ko tjínkáonrá sáchrókjuirá ntaha la ntá ó nchoxon chrókjónterá tí nkehe tjáhará sín la chrókóxakuanhyará chrókjuanchankíhyará ninkehó.

²⁸ Kjánchó tí chróntáchro jnkojín sín kixin tí nto la ó tsíkjokehe sín ijnko nkehe tsíkjanoya, ichro sín, ntá tí xikaha la chrókjóntehyará jahará, chrókóxakonhanrá kixin ntoáhya chrókjuenkayáxin tí nkexro chrónka xikaha.

29 Méxra ntáxrjan tíhi kixin tjínkakhonhya kixin ntoáhya chrókjuenkayáxin chojni ókjé, jehya kixin ntoáhya chrókjuenkayáxinrá jahará.

Kjánchó isorá tsjanchankìnará kixin nkekuènte chrókóxakonhanrá nkehe chrókjuenkayáxin ókjé chojni kixin tí kjuachaxin chontará.

30 Tí tjáncháha Dios kjuasáya kixin tí nkehe inè, çntá nkekuènte kixin chrókjontana chojni kixin kuènte kjonè?

31 Tí chrókjónterá nkehe la ko chrók'uirá nkehe la ko ichrén xra chrókjuich'erá la chrókjuákoxinrá kixin Dios kjuínkìtsará.

32 Ch'ehyará ninkehó nkehe chrókjuichroexin í so chojni kjónté judío sín la kjónté jehya judío sín la o tí chojni ninkoe Dios.

33 Janhan mé tjéyá kixin kaín xín xra tjét'a chrókóxrjínhin kaín xín chojni, na mé jehya kixin tjéyá kixin janhvàn chrókjuak'é jína. Náhi. Kjaxin tjínkavan kixin chrókuaáxin í so chojni.

11

1 Chrókjuákoxinrá jahará éxí kjuákoxiàn janhan kixin janhan mé kjuákoxiàn éxí kjuákoxin Cristo.

Jína chrók'uejó tí chojni chjin tió tójnkotsé chojni

2 Kíchóni, chàna kixin xráxín xráxinkáonrá tí janhan la ko nchexiteyéhérá tí nkehe kjuákohará.

3 A ntá tjínkavan kixin chrókiénxinrá kixin Cristo t'etuènnen jnkoinko chojni ntoa, la ko kjaxin xikaha jnkoinko chojni ntoa mé t'etuènnen tí ichjién, la ko kjaxin xikaha Dios mé t'etuènnen Cristo.

⁴ A ntá tí jnkójín chojni ntoa xrasixín kachjinke ch'án tí tjenixjehe ch'án Dios, o xrasixín ch'án kachjinke ch'án tí tjechronka ch'án iten Dios, mé xikaha tjakoxin ch'án kixin chóntehya ch'án kjuasáyé tí Ìnchéni t'etuenhen ch'án.

⁵ A ntá ijnko chojni chjin tjóchín kja tjan tí tjenixjehe tjan Dios la o tjóchín kja tjan tí tjechronka tjan iten Dios, mé xikaha tjakoxin tjan kixin chóntehya tjan kjuasáyé tí xìi tjan. Mé tóyóhe éxí tsíkjin tjan xikaha.

⁶ A ntá tí chojni chjin tjinkakonhya kixin chrók'uiáxin kja tjan nkehe mé chrókjin tjan. Kjánchó tí chrókósuèhe tjan chrókjin tjan, ntá chrók'uiáxin kja tjan tóte tíó tójnkotsérá.

⁷ Kixin tí chojni ntoa chrókjuasinhya ch'án kachjinke ch'án kixin jehe ch'án mé éxí retratóe Dios la ko t'inkaséyanxín ch'án tí kjuachaxin kuènte Dios. A ntá tí chojni chjin mé t'inkaséyanxín tjan tí kjuachaxin kuènte tí xìi tjan.

⁸ Kixin tí chojni ntoa saoxín k'óna mé k'uaxrjeníxinhya ch'án chojni chjin. Náhí. Tí chojni chjin mé k'uaxrjeníxin tí chojni ntoa.

⁹ Chaxín k'ónahya tí chojni ntoa kixin jehó tsjak'e ch'án. Náhí. Tí chojni chjin mé k'óna kixin tsjak'ekotoxin ch'án.

¹⁰ Ntá t'ichjánxin kixin tí chojni chjin ts'íáxin kja sín tóte chrókjuakoxin sín kixin t'ítuenhen sín kixin xikaha ts'ikon tí sín ángel.

¹¹ Kjánchó kaín ni tinkáchónkini Cristo t'ichjánxin kixin tí chojni ntoa chrókjuinkitsa tí chojni chjin la ko tí chojni chjin chrókjuinkitsa tí chojni ntoa.

¹² Kixin chaxín tí chojni chjin na tí chojni

ntoa k'uaxrjeníxin. A ntá jie tí chojni chjin na mé t'axrjeníxin tí chojni ntoa. A ntá kaín ni k'uaxrjeníxinni Dios.

¹³ Jahará nkechorá, ¿á ó nchoxon kixin ijnko chojni chjin tjóchín kja tjan chrónixjehe tjan Dios?

¹⁴ Jahórá chrókónohará kixin chrókósuèhe tí chojni ntoa chóna kaxihi kjínjin.

¹⁵ A ntá tí chojni chjin chóna kaxihi kjínjin la mé ntoá tíha kixin ó kuituénxin tjan kixin tsochóna tjan kaxihi tjan kjínjin kixin tsotjóchinha kja tjan.

¹⁶ A ntá tí tjen jnkójín nkexro titekakonhya tíha xikaha ntá chrókónohará kixin jeheni la ko kaín xín tí sín ninkoe Dios la xikahó kuènhenni.

Ntoáhya kjóne sín tí niotja xraxinkakonxín sín Ìnchéni

¹⁷ Méxra tí nkehe tjékjian la mé ijnko nkehe tóxrjínahya tjejoch'erá. Tió tójnksérá ntiha la ijnko nkehe jína chrókjuich'erá. A ntá náhi la ijnko nkehe jínahya tjejoch'erá.

¹⁸ Na mé saoxín na mé ntáchro sín kixin tió tójnksérá la jnkokoáhya tjenkayáxinrá. Ntáxrjan kixin ách'e chaxín xikaha tjejorá.

¹⁹ ¿Xá t'ichjánxin kixin chrók'uaxrjentará kixin chrókónoexínni kixin nkexro chaxín tinkáchónki Ìnchéni la ko nkexro tí náhi?

²⁰ Méxra tí xikaha jnkokoáhya tjenkayáxinrá ntá tió tójnksérá chrókjónterá niotja la chaxínha xraxinkákonxínrá Ìnchéni tí xikaha.

²¹ Kixin tió sinterá la senó isorá tjejonterá tí nkehe tsíkjasánkoará, la isorá la kjónté naxa t'énxinrá kjinta, la í sorá la tsíkókoaná.

22 ¿Á chontahyará nchia ntoará? Ntahó chrókjóntexínrá la ko chrók'uúxinrá nkehe. Mé xíkaha chontahyará kjuasáyé tí nínkoe Dios la ko nchesuèhérrá tí sín nõa chóntahya ninkehó. ¿Nkehe tsontáxrjan? ¿Á tsontáxrjan kíxin jína tjejoch'erá? Kjá náhi. Jehya jína tjejoch'erá.

Jína chróxraxinkakonxínni Ìnchéni

(Mt. 26.26-29; Mr. 14.22-25; Lc. 22.14-20)

23 Kíxin Ìnchéni mé chjina ch'án tí nkehe kjuáko hará: kíxin tí tie tsíkóxi ch'án na mé jehe ch'án kuákja ch'án tí nioṭja

24 ntá kjuixin kjuanchia ch'án kjuasáya ntá kóchrít'o ch'án tí nioṭja ntá ntáchro ch'án kíxin: “Tíhi mé ntona xránjon its'en kíxin jína ts'ejóxin tí jahará. Méxra xíkaha sích'erá kíxin tsoxraxinkákonxínrá tí janhan”, ichro ch'án.

25 La ko kjaxin xíkaha tió kjuixin kjóne sín ntá kuákja ch'án tí vaso la ntáchro ch'án kíxin: “Tíhi mé tjakoxin kíxin chaxín tsoxiteyá ijnko nkehe nixin kuènte Dios kíxin ts'ítji jnina. Tió its'irá tíhi mé tsoxraxinkákonxínrá tí janhan”, mé chro ch'án.

26 Kíxin tí interá tí nioṭja la it'irá tí ìnté to uva mé xíkaha tjejotjákoxinrá kíxin xíkaha k'uénxin Ìnchéni. Mé xíkaha tsjákoxinrá tsjixrakájia yaon tsokjan ch'án.

Ntoá chrókjóneni tí nioṭja kuènte Ìnchéni

27 A ntá jnkojín nkexro chjini chrókjóne sín tí nioṭja la ko chrók'ui sín tí ìnté to uva xraxinkakonxínni Ìnchéni, mé xíkaha chrókjuasin sín jje chrókjuikosáyehya sín tí cuerpo la ko tí ijnié Ìnchéni.

28 Méxra jnkojnkoní chrókjuenkayáxinni senó kixin á chóntahyani jie na ntá chrókjóneni tí niotja la ko chrók'uini tí ìnté to uva.

29 A ntá tí xikaha chjini chrókjóneni la ko chjini chrók'uini la chaxínhya chróxraxinkakonxínni tí cuerpo kuènte Ìnchéni la mé tí xikaha chrókjuich'eni la chrókjuasótexínni tíha.

30 Mé xikaha itsjérá níhará la ko itsjérá tsankahyará la ko jnkojínra k'uénra.

31 A ntá tí chrókjuatsõanni nkexrí tjen asénni jeheni ntá Ìnchéni t'ichjánxienhya chrókjuinçekjasóteni ch'án.

32 A ntá kjónté chrókjuinçekjasóteni Ìnchéni ntá chrók'uitjani chrókjuinçekxiteyéheni ch'án, ntá chrókjuasótehyani éxí tsjasóte tí í so chojni chjasintajni.

33 Méxra kichó ni, tió tójnksérá sinterá la chróchonhénra chrókui tí í so sín ntá chrókjóntekoará sín jnkokoá.

34 A ntá tí nkexro ik'uén kjinta la íchá jina senó chrókjónexín nkehe ntõe ó kixin ntá chrókjuinçekjasótehyará Dios kixin xikaha ntoáhya tójnksérá. A ntá tí í so nkehe la tsjásiyóxian janhan tió tsjasántsahará.

12

Nchakuen Dios mé chjéhe kjuachaxin jnkojnko chojni

¹ Kichóni, tjínkavan kixin tsonohará jina kixin nkexrí siín tí kjuachaxin tjanjon Nchakuen Dios t'áyéhe jnkojnko chojni.

2 Jahará ó nohará jína kixin tió naxa kuinkachónkehyará Ìnchéni na mé kuinkachréhérá tí nkehe tsíkjanoya nixjahya.

3 Méxra chrókónohará kixin nijnko nkexro nixjaxin kjuachaxin Nchakuen Dios tsjacha ts'ántaxínhin Jesús, la ko nijnko nkexro tsjacha tsontáchro sín kixin Jesús mé Ìnché sín tí nixjaxinnya sín tí kjuachaxin Nchakuen Dios.

4 A ntá nchónhya xra kuènte kjuachaxin Nchakuen Dios siín la kjánchó jnkokoá Nchakuen Dios mé tjetjanjon.

5 La ko siín nchónhya nkexrí sich'eheni xra Ìnchéni, kjánchó Ìnchéni la ójnkó nkexro tíha.

6 La ko nchónhya nkehe t'axrjexín tí xra ch'e jnkojnko chojni la kjánchó jnkokoá Dios tjetjanjon tí kjuachaxin ch'exinni xra kaín ni.

7 Jnkojnko chojni mé kujtonhen kixin chrókjuakoxin kjuachaxin kuènte Nchakuen Dios kixin xikaha chrókjuinkitsa kichó.

8 Iso chojni mé ts'áyéhe kjuachaxin tsonixja sín kjuaxrexinkaon jína kixin tjinkitsa Nchakuen Dios, la ko í so chojni ts'áyéhe kjuachaxin tsochrónka ijnko nkehe kuènte Dios noehya tí í so sín kixin Nchakuen Dios mé tjinkitsa sín tsonixja sín.

9 La ko í so chojni mé ts'áyéhe kjuachaxin antsí tsinkáchónki Dios kixin Nchakuen Dios mé tjinkitsa. La ko í so chojni mé ts'áyéhe kjuachaxin sinchekitohe chojni jína.

10 La ko í so chojni mé ts'áyéhe kjuachaxin ts-jasin sín kjuaxroan, la ko í so chojni mé ts'áyéhe kjuachaxin kixin Dios sinchenohe sín ijnko nkehe

tsochenka sín tí í so kíchó ni, la ko í so chojni mé ts'áyéhe kjuachaxin tsjatsəanxín á kjuachaxin kuènte Nchakuen Dios o á kjuachaxin kuènte ijnko nchakuen jínahya chronkaxín ijnko chojni, la ko í so chojni mé ts'áyéhe kjuachaxin kixin ijnko nkiva ókjé naxa k'uitjahya sín tsonixjaxin sín ijnko nkehe kuènte Dios, la ko í so chojni mé ts'áyéhe kjuachaxin tsochronkaxín nkexrí t'axrjexín tí nkehe ókjé nkiva tsíchronka tí í jnko chojni.

¹¹ Kjánchó kaín tíha jnkokoá Nchakuen Dios mé tjinkitsa, na mé k'uáyéhe jnkojnko chojni jnkojnko kjuachaxin éxí tjinkaon tí Nchakuen Dios nkerí xra chrókjuich'e sín.

Káinni k'ónani jnkokoá cuerpo kuènte Cristo

¹² Cristo la éxí yóhe ijnko cuerpo chóna nchónhya parte. A ntá ijnko cuerpo la jnkokoá kjánchó nchónhya parte chóna. Kjónté nchónhya parte chóna tí cuerpo la tí cuerpo la ójnkó. Mé xikaha Ìnchéni Cristo la ójnkó tí jehe ch'án.

¹³ Káinni kjónté chojni judío la kjónté chojni jehya judío, la kjónté chojni ch'exón xra, la kjónté chojni t'ítuenhya, kaín ni na mé jnkokoáxón Nchakuen Dios kuíkitexínni, na kaín ni k'ónani jnkokoá cuerpo kuènte Cristo, na mé éxí jnkokoá nkehe ik'uíni kaín ni na mé k'uáyéheni tí jnkokoá Nchakuen Dios.

¹⁴ Kixin tí cuerpo kuènteni la jehya jnkokoá parte chóna. Náhí. Itsjé parte chóna tí cuerpo.

¹⁵ Tí chróntáchro tí toteni kixin: “Jehya itja tí jeheni na mé jehya jeheni kuènte tí cuerpo”, na mé chaxínhya tíha kixin ó jehe cuerpo kuènte.

16 Kjaxin tí chróntáchro ijnko ntatsjoni kixin: “Jehya ikon tí jeheni na mé jehya jeheni kuènte tí cuerpo a”, na mé chaxínhya tíha kixin ó jehe cuerpo kuènte.

17 Tí chaxín kuenté cuerpo kuènteni chrók'óna ikonni, ¿ntá nkexrí chrókuinhinni? A ntá tí chaxín kuenté cuerpo kuènteni chrók'óna ntatsjoni, ¿ntá nkexrí chrókókaxraxéheni?

18 A ntá Dios kjuanjon ch'án kjuachaxin nkexrí ch'e xra jnkojnko nkehe kuènte cuerpo kuènteni kixin jehe ch'án nkexrí tjinkaon ch'án kóxrjínhin ch'án.

19 A ntá tí chrók'óna jnkokoá nkehe tíha, ¿a ntá nkexrí chrókjuak'e tí cuerpo a?

20 Kjánchó jie nchónhya parte chóna tí cuerpo kuènteni la ó jnkokoá tíha.

21 Tí ikonni la mé xitjahya tsontáche tí tjani kixin: “T'ichjánxienhyani tí jaha”, la ko kjaxin tí kjani xitjahya tsontáche tí toteni kixin: “T'ichjánxinnahya tí jaha.”

22 Náhi. Tí nkehe kuènte tí cuerpo tónhenni kixin tjetuanhya na mé kjónté antsí má t'ichjánxin

23 la ko í so nkehe kuènte tí cuerpo la kánhyó chónteheni kjuasáya na kjánchó antsí nchek'ítsáni ka. La ko tí nkehe náxrjónhya la antsí tóxakónhenni kixin tsonoxínhya.

24 A ntá tí nkehe náxrjón na mé t'ichjánxienhya ka ts'ítsá. Mé xikaha Dios kjuíncheyóxin kaín tí nkehe kuènte tí cuerpo kuènteni la ko jehe ch'án antsí chjéhe ch'án kjuasáya tí nkehe chrókjuikosáyehyani jeheni

25 kixin ninkehó xitjahya chróxikeyehe tí cuerpo kixin kaín tí nkehe la jnkokón tjinkítsa kichó.

26 Tió tsíkóníhi ijnko parte kuènte tí cuerpo la kaín tí í so parte la kjaxin tjoté; la ko tió tjikosáyehe sín ijnko parte la kuenté tsöchéhe.

27 A ntá jahará na mé kuènte tí cuerpo kuènte Cristo la ko jnkojnkora mé ijnko parte kuènte tí cuerpo kuènte ch'án.

28 Méxra Dios kjueyá ch'án chojni sich'ehe ch'án xra kuènte nínko, na mé saoxín kjueyá ch'án tí sín apóstol; la ko yóxin kjueyá ch'án iso chojni chjéhe ch'án kjuachaxin tsochrónka sín ijnko nkehe kjuínchenohe sín ch'án. La ko níxin kjueyá Dios iso chojni chjéhe ch'án kjuachaxin tsjako sín itén ch'án, la ko kjaxin kjueyá ch'án iso chojni chjéhe ch'án kjuachaxin tsjasin sín kjuaxroan, la ko kjaxin kjueyá ch'án í so chojni chjéhe ch'án kjuachaxin sinchekitohe chojni níhi jína, la ko kjaxin kjueyá ch'án í so kjojni chjéhe ch'án kjuachaxin antsí tjinkítsa kíchó, la ko kjaxin kjueyá ch'án í so chojni chjéhe ch'án kjuachaxin ts'etōan xra kuènte ch'án, la ko kjaxin kjueyá ch'án í so chojni chjéhe ch'án kjuachaxin tsonixjaxin sín íjnko nkìva.

29 Kénhya chojni tsík'óna apóstol, la ko kénhya chojni chóna kjuachaxin sinchenohe sín Dios ijnko nkehe tsochrónka sín, la ko kénhya chojni chóna kjuachaxin tsjako sín itén Dios, la ko kénhya chojni chóna kjuachaxin tsjasin sín kjuaxroan,

30 la ko kénhya chojni chóna kjuachaxin sinchekitohe sín chojni jína, la ko kénhya chojni chóna kjuachaxin tsonixjaxin sín ijnko nkìva ókjé, la ko kénhya chojni chóna kjuachaxin tsochronkaxín sín nkexrí t'axrjexín tí nkehe

chrónka tí sín nixjaxin ijnko nkìva ókjé. Chaxín kjá náhí.

³¹ Méxra tjéyará tí kjuachaxin antsí jína chrótjáhará Dios. Ntá jie tsjákohará ijnko ntia antsí jína chrók'uejorá.

13

Chrótjuèheni kichó ni

¹ Tí chróníxja nkívee chojni ó la ko kjaxin chróníxja éxí nixja tí sín ángel, ntá naxa chrótjuahya kichó ni la ó chónkó tíha la mé éxí chrókóyona chica tsjánka ó la ko éxí ijnko chica platillo nchevékjan sín ó, kixin ninkehó sòn chóntahya.

² La ko tí chrónixja itén Dios, la ko tí chrókianxian kaín nkehe kuènte Dios naxa noehya chojni, la ko tí chrókónona kaín nkehe, la ko antsí chrókuinkachónkia Dios ntá chrókuacha chróntátjan ijnko jna sáchrókjui ókjé, kjónté tí xikaha ntá naxa chrótjuahya kichó ni, ntá ninkehó sínkíhya tí jahan.

³ Tí chrókjuintakitonhan tí sín nòa kaín nkehe chonta, la ko tí chrókuánjuan kjuachaxin kixin chróchena kuenténa, kjónté tí xikaha ntá naxa chrótjuahya kichó ni la ntá ninkehó sínkíhya tíha.

⁴ Tí tjuèheni kichó ni na ts'ejóchónhenni kichó ni, tsonínkakuenhyani kichó ni, la ko sinchejína asénni, la ko tsochjinoxíenhyani, la ko sinchehnkehyan, la ko tsohnkehyan,

⁵ la ko ch'ehyani ninkehó nkehe náxrjónhya, la ko tjejáhyani nkehe kuènteni ó, la ko tsonínkakonhyani tjoka, la ko tsochóntahyani kjuanínkaon isé,

6 la ko kjaxin tsochèhyani tió í jnko chojni tjasin jie. Náhi. Chrókóchéheni tió ijnko nkehe jína sitónhen.

7 Tí tjuèheni kichó ni la kjónté kaín nkehe chrókjuasótexínni la chrókuitekaonni kixin jína sín la ko naxa chrok'uejóchónhenni chrókónínkakonhyani.

8 Tí tjuèheni kichó ni la jnkochrixin tsjak'e ts'itjáyannya. A ntá itsi ijnko yaon í t'ichjánxinhya tsochrónka chojni itén Dios, la ko tsokohya kjuachaxin tsonixjaxin chojni ókjé nkiva, la ko tsokohya kjuachaxin tsonohe chojni má.

9 Naxa t'itjáyan tí nkehe chrókónoheni la ko naxa t'itjáyan tí nkehe chróchronkaxínni.

10 A ntá tió tsonoheni kaín xín nkehe ntá tí nkehe ntoáhya k'uénoheni la mé ts'itjáyan.

11 Tió naxa chánjan janhan k'uéníxja éxí chánjan la ko k'uékjenkayáxian éxí chánjan. Ntá kóntetona ntá kuitohá tí nkehe kuènte chánjan.

12 Méxra éxí ijnko xrosenta t'ikonxínhyani jína jie, ntá tsi ijnko yaon chr'éxin ntá ts'ikonxínni jína kaín nkehe. Ijie naxa t'itjáyan tí nkehe chrókónòna; ntá tsi ijnko yaon tsonòna jína kaín xín nkehe éxí xikaha kjaxin Dios chóxin ch'án tí janhan.

13 Méxra, iní nkehe tjejó jnkochrixin, la mé ts'ejó chojni tsinkáchónki Dios, la ko ts'ejó chojni tsochónhen sín, la ko ts'ejó chojni tsotjuèhe kichó. A ntá iní nkehe síín, la kjánchó antsí má t'ichjánxin tsotjuèheni kichó ni.

14

Tí nixjaxin chojni ókjé nkiva

¹ Chrókóxakonhanrá kixin chrótjuèhérá kichuárá la ko kjaxin chrókjuéyará kixin Nchakuen Dios chrótjáhará kjuachaxin. Kjánchó antsí chrótjinkáonrá tí kjuachaxin tsochronkará ijnko nkehe kuènte Dios.

² Méxra, tí nkexro nixjaxin ijnko nkiva ókjé mé nixjehe sín Dios ó la ntá chojni la náhí, kixin kohya ninkexró tienxín tí nkehe nixja sín la mé nchakuen sín ó mé chronkaxín sín ijnko nkehe kuènte Dios noehya tí í so sín.

³ A ntá tí nkexro chronkaxín ijnko nkiva tienxín tí í so sín ijnko nkehe kuènte Dios mé nixjehe chojni ntá xikaha tjinkitsa tí í so sín kixin antsí chrók'uitja sín nkehe kuènte Dios la ko chrókóchéhe sín.

⁴ A ntá tí nkexro nixjaxin ijnko nkiva ókjé la mé tjinkitsa jehó ch'án antsí tsonohe tí kjuachaxin kuènte Dios. A ntá tí nkexro chronkaxín ijnko nkehe kjuínchenohe Dios mé tsjinkitsa tí sín kuènte njnko kixin antsí chrók'uitja sín nkehe kuènte Dios.

⁵ Tjínkavan kixin kaín rá chróchontará kjuachaxin chrónixjaxinrá ijnko nkiva ókjé. Kjánchó antsí tjetoan chróchontará kjuachaxin chróchronkará ijnko nkehe kjuínchenohará Dios. A ntá kánhyó tjetoan chrónixjaxinrá ókjé nkiva tí noahyará tsochronkaxinrá nkexrí t'axrjexín tí nkehe chróchronkará kixin chrókuinhin kaín tí sín tinkáchónki Ìnchéni kixin antsí chrók'uitja sín nkehe kuènte Dios.

⁶ A ntá kichó ni, tí chrókjuasantsjahará chrónixjaáxinrá ijnko nkiva ókjé la ó chónkó tíha. Íchá jína chrónixjaáxinrá ijnko nkiva tiénxinrá chróxrjankaxián ijnko nkehe kjuínchenòna Dios

la chróxrjankaxián ijnko nkehe kuènte Dios naxa noahyará, la chróxrjankaxián ijnko nkehe tjinkaon Dios chrókónohará, la chrókjuákoáxinrá ókjé nkehe nixin.

⁷ Kíxin kjaxin tí ison flauta la ko tí isón arpa, tí jnkokónhya chróntáchro jnkojnko són, ntá chrókjuachahyani chrókjuatsòanni nkehe tí ntáchro tí són a.

⁸ La ko éxí yóhe tí siín guerra, tjanjonko kíchó sín, la ntá ntoáhya chrók'uánao sín tí chica trompeta, ntá kohya nkexro chrókóyaxínhin sín sáchrókjuikjanjonko kíchó sín.

⁹ Kjaxin xikaha tí jahará tí nixjahyará ijnko tan tienxín sín, ¿ntá nkexrí chrókónohe sín nkehe tí ntáchrór? Mé xikaha tjejonixjará éxí chjéhe xrinto ó.

¹⁰ Chaxín siín itsjé nkìva chjasintajni la ko kaín nkìva la siín chojni tienxín sín.

¹¹ Kjánchó tí chrókianxinhya janhan tí nkehe tsontáchro ijnko nkexro, ntá tí nkexro a ts'ikon tí janhan éxí ijnko nkexro tsíkjixín ókjé la ko kjaxin janhan ts'íkuàn tí jehe ch'án éxí ijnko nkexro tsíkjixín ókjé.

¹² Méxra jahará imá tjinkáonrá chrók'uayéhérá ijnko xra kuènte Nchakuen Dios, ntá chrókójina chrókjuéyará tí xra chrókjuinkitsa tí í so sín kuènte njnko kíxin antsí chrók'uitja sín ijnko nkehe kuènte Dios.

¹³ Méxra tí nkexro nixjaxin ijnko nkìva ókjé la chrókjuanchehe Dios kíxin chrókjuinkitsa chróchronkaxín ch'án nkexrí t'axrjexín tí tan a.

¹⁴ Kíxin tí tsonixjaxian Dios ijnko nkìva ókjé, ntá tí nchakuenná ó mé tjenixjehe Dios, la ntá tí

kjuaxrexinkaon kuèntana la ókjé tjen.

¹⁵ A ntá tí xíkaha, ¿nkehe chrókjuít'a? Íchá jína chrónixjaxian Dios tí nchakuenná la chrókianxian janhan, la ko tió chrótsje janhan himno la chrótsjexian nchakuenná la ko chrókianxian janhan.

¹⁶ Kíxin tí tsochjeéxinrá kjuasáya Dios nchakuanrá ó ntá tjejótinhin í so chojni, ¿ntá nkexrí kíxin tí sín naxa kienxínhya sín tí nkehe nixjehérá Dios chróntáchro sín “Amén, ó nchoxon”?

¹⁷ Kjónté imá náxrjón tí chrókjuanchehérá Dios kjuasáya la ntá chrókienxínhya tí sín tjejótinhin, ntá chrokjuinkĩsahya kíxin chrók'uitja sín nkehe kuènte Dios.

¹⁸ Tjáncháha Dios kjuasáya kíxin antsí chonta janhan kjuachaxin tsonixjaxian ókjé nkìva, la ntá jahará la kánhyó nixjará xíkaha.

¹⁹ Kjánchó tió tójnkotsé chojni kíchó ni la mé ntáxrjan kíxin antsí tjínkavan chróníxja janhan kjónté in'ó palabra ó tienxín sín kíxin xíkaha chrókjuákuaxian sín, la ntá kánhyó chrókójína kjónté ite mil palabra chróníxjaxian ijnko nkìva ókjé tienxínhya chojni.

²⁰ Kíchóni, chrókjuenkayáxinhyará éxí chánjan. Kjánchó chrók'uejorá éxí chánjan naxa noehya nkehe jínahya. A ntá chrókjuenkayáxinrá éxí chojni nteto.

²¹ Tí xroon tsíkjin sín ósé nkexrí k'uetōan Dios mé ntáchro kíxin: “Janhan tsoníxjaxian ókjé nkìva la ko itén chojni ókjé kíxin tsinhin tí nación Israel na kjónté tsitekakonhya sín, xíkaha ichro Ìnchéni.”*

* **14:21** Isaías 28.11-12

22 **A** ntá tí kjuachaxin tsonixjaxin chojni ókjé nkíva mé xránjon kíxin chrókjuakoxin chojni chrókuinhin tí sín tinkáchónkihya Ìnchéni, jehya kíxin t'ichjánxin chrókuinhin tí sín tinkáchónki Ìnchéni. **A** ntá tí kjuachaxin tsochronka chojni ijnko nkehe kjuínchenohe sín Dios mé xránjon kíxin chrókjuakoxin chojni chrókuinhin tí sín tinkáchónki Ìnchéni, jehya kíxin chrókuinhin tí sín tinkáchónkihya Ìnchéni.

23 **A** ntá tió tójnkotsérá kaín rá tinkáchónkirá Ìnchéni, **a** ntá kaín rá chrónixjxinrá ókjé nkíva, ntá tí chrók'uixenhen nchia ijnko chojni naxa kuènhya sín xíkaha, **o** chrók'uixenhen nchia ijnko chojni naxa tinkáchónkihya Ìnchéni ntá chrókuinhin sín xíkaha la kjá tsontáchro sín kíxin ó k'uíxikjánrá.

24 Kjánchó tí chróchronkará kaín rá ijnko nkehe kjuínchenohará Dios ntá chrók'uixenhen nchia ijnko nkexro tinkáchónkihya Ìnchéni, **o** chrók'uixenhen ijnko chojni naxa tienhyé, ntá chrókuinhin sín nkehe tjejonixjará kaín rá ntá chróxraxinkaon sín tí jié chóna sín ntá chrókuítóhe sín kaín jié chóna sín.

25 Ntá tsonoxín tí nkehe mó tjenkayáxin sín nkaya asén sín ntá ts'ejóxin toch'in sín tsoxraxinkaon sín Dios la ko tsontáchro sín kíxin chaxín tjejókoará Dios.

Ntoá chrókjuich'eni kaín xín nkehe tió tójnkotséni

26 **A** ntá kichó ni, ¿nkehe chrókónhen? Tió tójnkotsérá na mé isorá chrótsjerá salmo, la ko isorá chrókjuàkorá, la ko isorá chróchronkará ijnko nkehe kjuínchenohará Dios, la ko isorá

chrónixjāxīnrá ijnko nkìva ókjé, la ko isorá chróchronkaxínrá nkexrí t'axrjexín tí nkehe nixjāxīn tí í so sín ókjé nkìva. Kjánchó kaín tíha tsonhen kíxīn tí sín kuènte nīnko chrók'uitja sín nkehe kuènte Dios.

²⁷ A ntá tí chrónixjāxīn sín ijnko nkìva ókjé na mé yaá o iy'á chojni chrónixja sín la ko chrók'uixínkí chojni tsonixja, la ko t'ichjānxīn kíxīn jnkojín nkexro nohe tsochronkaxín nkexrí t'axrjexín tí nkehe nixja sín.

²⁸ A ntá tí kohya ninkexro tí nīnko ntaha tsjacha tsochronkaxín nkexrí t'axrjexín tí nkehe chrónixja sín, ntá chrónixjāxīnhya sín ókjé nkìva tí tjejótojnkotsé sín, na mé chrónixjēhē sín asén sín ó la ko chrónixjēhē sín Dios ó.

²⁹ Tjánjonrá kjuachaxin kíxīn tsonixja yaá o y'á chojni k'uáyēhē sín kjuachaxin tsochronka sín nkehe kjuínchenohe sín Dios. A ntá tí sín tjejótinhin mé chrókjuenkayáxīn sín á ó nchoxon tí nkehe kuínhin sín.

³⁰ A ntá tí xrínahya chrókjūinchenohe Dios ijnko nkehe ijnko nkexro tjetjāxīn ntá chróchronka ch'án tíha. A ntá tí nkexro senó kjuankíxīn chrónka nkehe la chróchónhen ch'án chrónixjahya ch'án.

³¹ Ó nchoxon jnkojnkora chróchronkará nkehe tjáhará Dios kíxīn xíkaha kaín rá chrók'uitjárá la ko chrókócháhará.

³² A ntá tí nkexro k'uáyēhē kjuachaxin tsochronka nkehe kjuínchenohe Dios kjāxīn t'ichjānxīn chróchónhen tsochronkaxín í jnko nkexro.

³³ Kíxīn Dios tjanjon tí kjuaxróxīn, a ntá tjinkakonhya ch'án kíxīn yóxīnhya chrók'uejóni.

Tió tójnkotsé chojni kíchó ni tinkáchónki Ìnchéni
 34 chrónixjahya tí chojni chjin jnkosiné servicio. Kohya kjuachaxin xíkaha, na mé chrókjuinchexiteyéhe sín tí sín ntoa éxí t'etōan tí ley kuènte Dios.

35 Tí tjinkaon sín tsonohe sín nkehe na mé chrókjuanchankíhi sín xìi sín tió tjiji sín ntoe sín. Náxrjónhya chrónixja ijnko chojni chjin nkehe jnkosiné servicio.

36 Chrókónohará kixin tí itén Dios xrankíxixínhya tí tjejorá la ko jehya jahóra k'uayéhérá tíha.

37 A ntá tí tjen jnkojín nkexro tjenkayáxin kixin nixja itén Dios o tjenkayáxin kixin tí Nchakuen Dios tjinkítsa tí jehe ch'án ntá chrókónohe ch'án kixin tí nkehe tjéjjan mé ijnko nkehe tsík'etōan Ìnchéni.

38 A ntá tí nkexro titekakonhya tíhi na ntá jahará chrókuitekákuénhyará ch'án kjaxin.

39 Méxra kíchó ni, chrókjuéyará kixin chrók'uayéhérá kjuachaxin chróchronkará nkehe kjuínchenohará Dios la ko chrókuítōhérá tsonixjaxin chojni ókjé nkìva.

40 Kjánchó kaín xín nkehe la jnkojína la ko kjuasáya chrókónhen.

15

Tsíxechón Cristo

1 A ntá jie kíchó ni, tjínkavan chrórxaxinkáonrá nkehe tí tan kuaáxinrá kjuáakohará. Tíha mé kuítekáonrá, la mé tíha mé tjejóxinrá jína.

² Kjaxin tí nkehe kjuákohará mé kuaáxinrá, tí títóéhyará tí nkehe kjuákohará; tí la náhí la chónkó kuinkachónkirá tí nkehe kjuàkua.

³ Səoxín, kjuákohará tí nkehe k'uayáha kixin Cristo k'uenyákonhen ijiéni, na mé xikaha kjuínchexiteyá ch'án tí nkehe ntáchro tí xroon itén Dios

⁴ la ko tsíkjavá sín ch'án la ko tsíxechón ch'án tí nixin yaon éxí ntáchro tí xroon itén Dios.

⁵ Ntá k'uíkon ch'ín Pedro tí jehe ch'án, ntá chr'éxin inaá tí teyó sín k'uék'ajiko ch'án k'uíkon sín tí jehe ch'án.

⁶ A ntá chr'éxin chjina quinientos chojni kichó ni jnkokoá k'uéjó sín k'uíkon sín ch'án. A ntá jie itsjé tí sín a naxa tjejó sín, a ntá jnkojín sín na ó tsík'en sín.

⁷ Chr'éxin k'uíkon ch'ín Jacobo tí jehe ch'án, la ko k'uíkon kaín tí í so sín apóstol inaá.

⁸ A ntá kjuixixín janhan k'uíquən Ìnchéni éxí ijnko xjan naxa xetjahya yaon chrókójihi.

⁹ Kjánchó janhan kánhyó tjetotan la mé tóyóehya tí í so sín tsíkjejá Ìnchéni la ko tósuàna chrók'óna ijnko nkexro ch'ehe xra Ìnchéni kixin janhan mé k'uénínkəkonhan tí sín ninkoe Dios.

¹⁰ Kjónté jínahya kjuít'a la kjuasáyé Dios la ko kjuachaxin kuente ch'án mé kjuítóxinhin tí kjuenkayáxian, na mé chónkóhya kuíkonóna ch'án, kixin tjetóxin kjuít'a xra la kaín sín la kánhyó. Kjánchó jehya janhan kjuít'a xra. Náhi. Dios kjuínkítsana ch'án kjuít'a xra.

¹¹ Kjánchó tjetuanhya á janhan o á jehe sín kjuako sín, kixin xikaha tí itan kjuakoni, a ntá

kuítekáonrá.

Tsoxechón tí sín tsík'en

¹² A ntá tí tjakoni kixin Cristo la xechón, ¿ntá nkekuènte ntáchrórá jnkojínrá kixin tsoxechónhya chojni tsík'en?

¹³ Tí chrókóchaxín tí nkehe ntáchrórá kixin tsoxechónhya chojni tsík'en, ntá kjaxin chróxecónhya Cristo.

¹⁴ A ntá tí chaxínhya xechón Cristo, ntá chónkó tí nkehe tjakoni la ko ninkehó sínkíhya la ko chónkó tí nkehe kuítekáonrá.

¹⁵ A ntá tí chaxínhya xíkaha tsíkónhen, la jeheni la ijnko chojni ntoáhya chrónka kuènté Dios, kixin ó chrónkani kixin Dios kjuínchexechón Cristo. A ntá tí chrókóchaxínhya kixin chróxecón Cristo, ntá kjaxin chrókóchaxínhya kixin chróxecón chojni tsík'en

¹⁶ kixin tí chróxecónhya tí chojni tsík'en, ntá kjaxin Cristo chróxecónhya ch'án.

¹⁷ A ntá tí Cristo chróxecónhya ch'án ntá chrókóchónkó tí kuítekáonrá tí jehe ch'án kixin naxa chrókjulinhya tí ijiará.

¹⁸ La ko tí chrókóchaxín tíha ntá chrók'uitjáyan tí sín kuítekaon Cristo ik'uén sín.

¹⁹ Méxra tí chrókuinkáchónkini Cristo kixin chrókuinkítsa ch'án tí jeheni chjasintajni ntihyó, ntá kohya chojni chrókóyóhe tí jeheni, imá chrókónòéni chrók'uejóni kaín nì.

²⁰ Kjánchó náhí, la chaxín ó xechón Cristo. Jehe ch'án éxí tí nkehe tsík'óna saxín kixin jehe ch'án saxín xechón ch'án.

21 Méxra jnkokoá chojni ntoa kjuankíxin kjuasin jiē, ntá kjuankíxin k'uén kaín xín chojni chjasintajni, la ko kjaxin jnkokoá chojni ntoa xechón, ntá xikaha tsoxechón kaín chojni tsík'en.

22 Kíxin tí jiē kjuasin ch'ín Adán ntá kaín xín chojni sít'enxín sín. A ntá Cristo la kaín ni tsochóntaxínni kjuachón.

23 Jnkojnkoní éxí tsoñhenni tocar, na mé saoxín xechón Cristo, a ntá chr'éxin tió tsokjan ch'án ntá tsoxechónni kaín ni kuítekaonni tí jehe ch'án.

24 A ntá ó tsi yaon tsjixixín ntá sinchek'itjáyan Cristo kaín xín nkehe t'etōan la ko kaín xín kjuachaxin ókjé, ntá tsjanjon ch'án tí xra t'etōan kíxin ts'áyéhe It'é ch'án Dios.

25 Na mé t'ichjánxin ts'etōan Cristo tsjixrakája tí yaon tsjachahya tí sín nínkakonhen ch'án.

26 A ntá tí nkehe tsjixixín ts'itjáyan la mé tí kjuach'éñ.

27 A ntá Dios kjuanjon kjuachaxin kíxin kaín nkehe siín mé chrók'uētuenhen Cristo.* Kjánchó tió xikaha ntáchro tí xroon itén Dios tsíkjin sín ósé kíxin kaín xín nkehe mé ts'etuenhen ch'án, ntá ó noheni jína kíxin jehya kíxin Dios la chrók'uítuenhen ch'án inaá. Náhi. Jehe ch'án mé chjéhe Xjeen ch'án kaín kjuachaxin ts'etuenhen ch'án kaín xín nkehe.

28 A ntá tió tsjixin tsjacha Cristo ts'etuenhen ch'án kaín xín nkehe, ntá Cristo, mé tí Xjeen Dios, la kjaxin sinchexiteyéhe ch'án It'é ch'án Dios kíxin ntá Dios mé ts'etuenhen ch'án kaín xín nkehe.

29 A ntá í jnko nkehe, la iso sín tikiteyákonhen tí

* 15:27 Salmo 8.6

sín tsík'en. ¿Nkekuènte xikaha ch'e sín tí titekakonhya sín kixin tí sín tsík'en tsoxechón sín ínaá?

³⁰ A ntá tí xikaha, ¿nkekuènte kixin kaín yaon kjuaxróxinhya tjejóni nínkakönhenni chojni?

³¹ A ntá kichó ni, kaín yaon siín kjuachrakon chrók'uèn janhan. Chaxín tíhi, kjánchó chàna kixin jahará kjaxinrá tinkachónkirá Ìnchéni Jesucristo.

³² Kjonté kónínkakonna chojni chjasin Éfeso éxí iko jiehe la kjonté kjuak'é ntiha, ¿la ntá nkehe chrókjuacha tí janhan tí chrókóchaxínhya chróxechón chojni tsík'en? Tí xikaha la ó nchoxon tí nkehe ntáchro tí sín titekakonhya Ìnchéni kixin chrókjóne sín la ko chrók'ui sín kixin ijie la o ntóye chrók'uèn sín.

³³ Chrókuítóéhyará chrokjuit'áyahará sín. Éxí ntáchro sín kixin: “Tí chrók'uejókotoxinni chojni jínahya ntá chrók'uitjáyan tí nkehe jína tjenkayáxinni.”

³⁴ Chrókjanrá ntia jína ntoá la chrókjuásinhyará jie. Méxra isorá naxa chonhyará Dios. Na mé ntáxrjan tíhi kixin chrókósuàhará.

Nkexrí tsoxechón tí sín tsík'en

³⁵ Kjá jnkojínrá tsjanchankìnará kixin: “¿Nkexrí tsoxechón tí sín tsík'en la ko nkexrí tsotsjehe tí cuerpo tsochónta sín?”

³⁶ Lontirá tjanchankìnará xikaha. Tí noatje t'enkanı nonte t'ichjánxin its'en ts'itjáyan kixin tsjak'echón tí nkehe ts'ayan.

³⁷ Tí nkehe t'enkanı la jehya tí ka a. Náhí. Tí nkehe t'enkanı la noatrigo o í jnko tje.

38 Kjánchó Dios kjuanjon kjuachaxin kixin jnkojnko nta ts'óna éxí tjinkaon ch'án, la ko jnkojnko nta tsochóna tje kuènte.

39 A ntá jehya kaín tí cuerpo la jnkokon. Náhí. Ijnko la cuerpo kuènte chojni, la ko í jnko la cuerpo kuènte ko, la ko í jnko la cuerpo kuènte koxroxé, la ko í jnko la cuerpo kuènte koche.

40 Na mé kjaxin xikaha siín cuerpo kuènte tí sín ángel tjejó nkaya nkajní la ko siín cuerpo kuènte chojni tjejó chjasintajni. A ntá tí cuerpo kuènte tí sín ángel la náxrjón tsjehe la ko kjaxin tí cuerpo kuènte tí chojni la náxrjón tsjehe, kjánchó ókjé nkexrí tsjehe.

41 Ókjé nkexrí t'inkaséyanxín tí yaon la ko ókjé nkexrí t'inkaséyanxín tí nitjó la ko kjaxin konotsé la ókjé nkexrí t'inkaséyanxín la ko kjónté itsjé konotsé la ókjé t'inkaséyanxín jnkojnko.

42 Kjaxin xikaha tsonhen tí chojni tsik'en tsoxechón sín. Tí nkehe tsoxravá la mé ijnko nkehe tsotje, a ntá tí nkehe tsoxechón la mé ijnko nkehe ts'itjáyanhya.

43 Tí nkehe tsoxravá la ijnko nkehe náxrjónhya tíha, la ntá tí nkehe tsoxechón la ijnko nkehe imá náxrjón. Tí nkehe tsoxravá la ijnko nkehe chóntahya kjuachaxin, la ntá tí nkehe tsoxechón la ijnko nkehe tsochóna kjuachaxin.

44 Tí nkehe tsoxravá la mé cuerpo kuènte chojni chjasintajni ó. La ntá tí nkehe tsoxechón la mé cuerpo antsí tsochóna kjuachaxin kuènte Nchakuen Dios. A ntá tí chóntani cuerpo kuènte chojni chjasintajni ó na mé kjaxin tsochóntani cuerpo antsí tsochóna kjuachaxin kuènte

Nchakuen Dios.

⁴⁵ A ntá éxí ntáchro tí xroon itén Dios kixin: “Tí chojni ntoa k'óna saoxín mé ch'ín Adán tíha mé k'uáyéhe ch'án kjuachón ó.”† A ntá tí ó kjuixixín ikui í jnko ch'ín éxí yóhe Adán, kjánchó jehe ch'án mé chóna ch'án nchakuen tjanjon kjuachón.

⁴⁶ Kjánchó jehya saoxín k'óna tí cuerpo antsí chóna kjuachaxín kuènte Nchakuen Dios. Náhí. Saoxín k'óna cuerpo kuènte chojni chjasintajni ó, la ntá chr'éxín k'óna cuerpo antsí chóna kjuachaxín kuènte Nchakuen Dios.

⁴⁷ Tí nkexro k'óna saoxín la k'óna nche na mé kjuák'e ch'án chjasintajni ó. A ntá tí nkexro k'óna yóxin na mé nkaya nkajní kuixín ch'án.

⁴⁸ Tí cuerpo siín chjasintajni mé yóhe tí cuerpo k'uéchóna tí nkexro tsík'óna nche. A ntá tí cuerpo siín nkaya nkajní mé yóhe tí cuerpo chóna tí nkexro kuixín nkaya nkajní.

⁴⁹ Éxí senó tóyóhèni tí nkexro k'óna nche, ntá xikaha chr'éxín tsoyóhèni tí nkexro kuixín nkaya nkajní.

⁵⁰ Ntá tsotjonkará nkehe, kichó ni. Tí cuerpo k'óna nto la kō hueso chóntani jie xitjahya sátsjikoni tí tjen Dios t'etōan ch'án. Na mé tí nkehe tsjeje xitjahya ts'áyéhe tí nkehe tsjejehya.

⁵¹ A ntá tsotjonkará ijnko nkehe ninkexró noehya, kixin kénhyani its'enni. Kjánchó kaín ni ts'ixitóxínhin tí cuerpo chóntani.

⁵² A ntá xrínahya titàya tjejóni ntá éxí chróchr'áton konni la ko chrókuakitjenkini konni xikaha tió tsjixixín tsinhinni tsontáchro trompeta,

† 15:45 Génesis 2.7

la ntá kaín chojni tsík'en tsoxechón, í ts'enhya sín, la ko kjaxin jeheni kaín ni ts'ixitóxinhin tí cuerpo chóntani.

⁵³ A ntá tí cuerpo chóntani la tsjeje, ntá t'ichjánxin ts'inkáya nkehe chónhya tsjeje. La ko tí cuerpo chóntani la ts'en ntá t'ichjánxin ts'inkáya nkehe chónhya ts'en.

⁵⁴ A ntá tío tí cuerpo chóntani la tsjeje, na mé t'ichjánxin ts'inkáya tí nkehe chónhya tsjeje, la ko tío tí cuerpo chóntani la ts'en, na mé t'ichjánxin ts'inkáya tí nkehe chónhya ts'en. Ntá tí xíkaha na ntá tsoxiteyá éxí nixja tí xroon itén Dios ntáchro kixin: “Tsjachahya tí kjuach'én la mé tsjacha tí kjuachón.”‡

⁵⁵ “Jaha kjuach'én, ¿kjá tí kjuachaxin kuènta kixin chrókjuacha jaha? Jaha kjuach'én, ¿kjá tí kjuachaxin kuènta kixin chrók'oyánni?”§

⁵⁶ Tí jje tjasinni mé kuixin tí ts'enni. A ntá tí ley k'uetóan ósé antsí k'uíxín jje.

⁵⁷ A ntá tjancheheni Dios kjuasáya kixin ichr'án ch'án Ìnchéni Jesucristo kixin táha mé tsaáxinni.

⁵⁸ A ntá jahará kichó ni, imá tjuahará. Chrókuitoéhyará tinkachónkirá Ìnchéni. Jnkochríxín chrókjuich'ehérá Ìnchéni xra antsí jína kixin ó nohará jahará kixin tí xra ch'eheni Ìnchéni jehya chónkó tíha.

16

Tí ofrenda tjenájín sín tsochr'énhen sín tí sín tjejó chjasin Jerusalén

‡ 15:54 Isaiás 25.8 § 15:55 Oseas 13.14

¹ A ntá tí chichaon t_jénájínrá kíxín tsjínkítsará tí sín kíchó ni tinkáchónki Ìnchéni na mé chrókjuich'erá éxí kuétuanhan tí sín nínko estado Galacia.

² Jnkojnko domingo jnkojnkorá chrókuakitsjenteherá nkerí síká chichaon kjuachará tí semana kjuich'erá xra kíxín t'ichjánxínhya chrókjuasánjia janhan ntá chrókjuénájínrá chichaon.

³ A ntá tió tsjasán janhan tsétuanhan tí sín tsjéyará kíxín sátsji sín chjasin Jerusalén, na ntá tsokjian xroon tsjikoxín sín tí chichaon tsíkjenájínrá tsjikaán tí sín kíchó ni ntiha.

⁴ A ntá tí chrókójína kjaxin janhan sáchrókjuiyá, a ntá sáchrókjuíkian tí jehe sín kjaxin.

Tjenkayáxin ch'in Pablo nkexrí sátsji ch'an

⁵ Tí sátsjia la t'ichjánxín ts'atsínka janhan estado Macedonia ntá chr'éxin tsjasán ntiha chjasin Corinto.

⁶ Ách'e ntahó chrókuítõna chrók'uat_sínkajia nchakuen kin. A ntá jahará chrókjuínkítsará tí janhan tió sátsjia ókjé chr'éxin.

⁷ Méxra t_jínk_akonhya chrók'uat_sínkoá chrótsjahará ó. Náhí. T_jínk_avan chrókuítõna iso yaon tí tjejorá ntiha tí Ìnchéni chrókjuanjon kjuachaxin.

⁸ Kjánchó tsitõna chjasin Éfeso tsjixrakájia yaon Pentecostés,

⁹ kíxín ntihi antsí chonta kjuachaxin chrókjuít'a xra kuènte Ìnchéni la ko jína chrókónhen tí xra kjónté nchónhya chojni nínkakonna.

10 A ntá tí tsjiji ch'ín Timoteo ntiha la antsí jína chrónixjehérá ch'án kixin kjuaxróxin chrók'uejokoará ch'án kixin jehe ch'án kjaxin ch'ehe Ìnchéni xra éxí janhan.

11 Kaín tí jahará chróchontehérá ch'án kjuasáya. Tjínkĩtsará ch'án kixin jína itsi ch'án ntihi tsitsjehe ch'án tí janhan kixin tjéchonhan chrókui ch'án la ko tí í so sín kíchó ni.

12 A ntá tí kíchó ni Apolos la imá xrjanóaha ch'án kixin kjaxin chrókjuijiko ch'án tí í so kíchó ni, kjánchó tjinkakonhya ch'án jie. Chr'éxin tsjiji ch'án tíó ts'íxranka.

Kjuixixín nixja ch'ín Pablo

13 Chrókjuenkayáxinrá la ko chrók'uejotsjehérá. Chróchrakonhyará la ko chrókuitoéhyará tí tinkachónkirá Ìnchéni.

14 Kaín nkehe chrókjuich'erá la koí chróttjuèhérá kichuára.

15 Na ntá kíchó ni, ó nohará kixin tí sín kjéhya ch'ín Estéfanos saoxín kuinkáchónki sín tí tan tsaáxin chojni tí estado Acaya, la ko jehe sín kuákja sín xra a tjínkĩtsa sín tí sín kíchó ni tinkáchónki Ìnchéni.

16 Tjínkavan kixin chrókjuinchexiteyéhérá tí sín tjínkĩtsa éxí tí jehe sín la ko kaín tí sín ch'e xra.

17 Chàna kixin ó kui ch'ín Estéfanos la ko ch'ín Fortunato la ko ch'ín Acaico, kixin jahará kjónté tjejohyará.

18 A ntá jehe sín kjuínchechéhe sín asenná éxí kjuínchecháhará sín. Chróchontehérá kjuasáyé chojni xikaha.

19 Tí sín tójnoktsé estado Asia xraxinkaon sín tí jahará. Kjaxin ch'ín Aquila la ko tjan Priscila la ko

tí sín tójnkotsé ntøe sín ima xraxinkaon sín tí jahará kixin tinkachónkirá Ìnchéni.

²⁰ Kaín tí sín kichó ni ntihi xraxinkaon sín tí jahará. Nixjehérá kichuára kaín rá tsehérá tja kichuára jnkojína.

²¹ Janhan Pablo xráxinkavan tí jahará ikjian xroon chr'anhánrá la tjaná kjinxian tí letra i.

²² Tí nkexro tjuèhya Ìnchéni Jesucristo la tsjasóte. A ntá jeheni, la Ìnchéni xrákiá.

²³ A ntá kjuasáyé Ìnchéni Jesucristo mé sin-tayaonrá ch'án.

²⁴ Tjuahará kaín rá kixin kaín ni tinkáchónkini Cristo Jesús. Amén. Ó tjen.

**Tí Nuevo Testamento cuènte Inchéni
Jesucristo C'óna Nquìva
New Testament in Popoloca, San Juan Atzingo**

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Juan Atzingo

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

b9b09122-b3f6-59f0-9594-749907b32b5b